

一九八七年冬月出版

香港何氏宗親總會會刊

何石江

敬題



永久會址香港灣仔莊士敦道36—42號一樓

何氏世系源流



軒轅建曆四千六百八十四年，歲七十九丁卯，公元一九八七年春月，宗末竹平謹按史記，春秋左傳，詩經，漢書，香山小攬何氏九郎族譜，南海疊滔何氏家譜，番禺沙灣廬江宗譜，番禺大石何氏家譜，順德西馬寧何氏族譜，順德何不偕先生不去廬集，順德水藤何厚本堂宗親會會刊及馬來西亞何氏崇德堂家譜等典籍，節文撮要，敬慎將事，而述之曰。

遠溯吾宗，本支於黃帝，源流於姬周，派衍於韓原，爲姓韓氏，名顯諸侯。及秦滅六國，有韓城者避亂於廬江之間，邀天之祐，因寒以喻韓，因河而易何而逃刦隙也。自是定族於廬，世爲何氏，生聚於江淮河漢，歷秦漢魏晉六朝，隋唐五代，至南宋而珠璣巷播遷，枝葉遍傳五嶺之南矣。是則何承於韓，韓承於姬周，姬周承於黃帝，是猶木之有本，水之有源也。

史記五帝本紀第一『黃帝者，少典之子，姓公孫，名軒轅，生而神靈，弱而能言，幼而徇齊，長而敦敏，成而聰明。修德振兵，諸侯咸尊軒轅爲天子，代神農，是爲黃帝。』黃帝生於壽丘，長於姬水，在位百年而崩。有四妃，元妃娶於西陵，曰嫫祖。黃帝二十五子，其得姓者十四人，爲十二姓，曰姬，曰酉，曰祁，曰己，曰滕，曰葴，曰任，曰荀，曰僖，曰姞，曰儇，曰衣。嫫祖生二子，長曰玄囂，次曰昌意。玄囂生蟜極，蟜極生帝嚳高辛。

高辛生而神靈，聰以知遠，明以察微，順天之義，知民之意，仁而威，惠而信，修身而天下服。高辛有子四，曰放勳，即帝堯，曰高，曰摯，曰弃。皆爲黃帝之玄孫。

史記周本紀第四『弃爲兒時，屹如巨人之志，其游戲，好種樹麻菽，及爲成人，遂好耕農，民皆法則之。帝堯聞之舉弃爲農師，播時百穀，天下得其利，有功，封弃於邰，號曰后稷，

別姓姬氏。』是爲姬周始祖。后稷之曾孫公劉『能脩后稷之業，務耕種，行地宜，取材用，行者有資，居者有畜積，民賴其慶，百姓懷之，多徙而保歸焉，周道之興自此始。』

后稷十三傳孫，古公亶父，積德行義，國人皆戴之，作五官有司，民皆歌樂之，頌其德。古公有長子曰太伯，次子曰虞仲，少子曰季歷，季歷娶得賢婦曰太任，生昌，有聖瑞。古公曰，我世當有興者，其在昌乎。是爲姬周文王，遵后稷，公劉之業，則古公，季歷之法，篤仁敬老，禮下賢者，諸侯皆嚮之，士以多歸之，周是以王，姬姓以蕃。文王崩，子武王立。武王即位，以呂尚爲師，弟周公爲輔，脩文王緒業，時殷紂爲天子，昏亂暴虐滋甚。武王徧告諸侯，會師於牧野，以伐無道，紂師雖衆，皆倒兵以戰，以迎武王，武王馳之，紂敗退鹿臺，自燔於火而死，殷商以亡。諸侯畢拜武王，武王受天明命，天下歸周。

武王克商之後，『命宗祝享祠於軍，乃罷兵西歸，行狩，記政事，作武成，封諸侯，班賜宗彝，作分殷之器物。』武王崩，子成王立，成王少，周公以周初定天下，恐諸侯叛周，乃攝行政當國，管叔蔡叔羣弟疑周公，乃與武庚作亂叛周，周公伐誅武庚管蔡，以安天下。

春秋左傳『昔周公弔二叔之不咸，故封建親戚，以蕃屏周，管，蔡，郕，霍，魯，衛，毛，聃，郜，雍，曹，滕，畢，原，鄆，郇，文之昭也。邢，晉，應，韓，武之穆也。』香山小欖何氏九郎族譜何氏原統宗圖序『何出自韓，厥姓曰姬，周武王庶子，成王時分土於韓，列爵爲侯。』番禺沙灣留耕堂廬江宗譜『韓氏之先，實宗周武。』蓋皆本於此也。

詩經大雅『奕奕梁山，維禹甸之，有倬其道，韓侯受命。』又曰『韓侯出祖，出宿於屠，顯父餞之，清酒百壺。』顧韓之在當時，固爲武王之穆，且與文王之昭，並列諸侯之位，爲伯叔昆弟之邦，盛於一時也。其後周道衰，諸侯相侵略，成五霸七雄之局。

春秋左傳『虞，虢，焦，滑，霍，揚，韓，魏，皆姬姓也，晉是以大，若非侵小，將何所

取，武獻以下，兼國多矣。』是韓以事微國小，春秋無語，土爲晉併，子孫世事晉國。

史記韓世家第十五『韓之先，與周同姓，姓姬氏，其後苗裔事晉，得封於韓原，曰韓武子，武子後三世，有韓厥，從封姓爲韓氏。』晉景公時，厥將兵代齊，敗齊師於鞍，遂爲晉卿，號獻子。厥義存趙氏之孤，太史公曰，此天下之陰德也，韓氏之功，於晉未覩其大者也。然與趙魏終爲諸侯十餘世，宜乎哉。獻子傳宣子，宣子名起，有賢名，嘗適於魯。

春秋左傳『韓宣子適魯，見易象與魯春秋曰，周禮盡在魯矣，吾乃今知周之德與周之所以王。』宣子傳貞子，徙居平陽。貞子傳簡子，簡子傳莊子，莊子傳康子，世爲晉卿。康子與趙襄子魏桓子共敗智伯，分其地，地益大，大於諸侯。康子傳武子，武子傳景侯虔，與趙魏名齊諸侯。景侯虔傳列侯，列侯傳文侯，文侯傳哀侯，哀侯元年，與趙魏分晉國土，爲韓國，爲七雄之一。哀侯傳懿侯，懿侯傳昭侯，昭侯八年，申不害相韓，脩述行道，國內以治，諸侯不敢侵伐。昭侯傳宣惠王，宣惠王傳襄王，襄王傳釐王，釐王傳桓惠王，桓惠王之世，屢受秦攻，被略地甚多。桓惠王卒，子王安立。王安五年，秦復來攻，王安使韓非使秦言和，秦留韓非，復殺之。秦始皇十七年，公元前二百三十年，秦虜王安，盡取韓地，爲穎川郡。史記留侯世家第二十五『留侯張良者，其先，韓人也。祖父開地，相韓昭侯，宣惠王，襄王，釐王。父平，相釐王，桓惠王，平卒。秦滅韓，良年少，未宦事韓。良家僮三百人，悉以家財求客刺秦王，爲韓報仇。東見倉海君，得力士，爲鐵椎重百二十斤。良與力士狙擊秦皇帝博浪沙中，誤中副車。秦皇帝大怒，大索天下，求賊甚急。』良後佐漢滅秦，封留侯。古文評註，蘇軾留侯論『當韓之亡，秦之方盛也，以刀鋸鼎鑊待天下之士，其平居無事夷滅者，不可勝數，雖有貴育，無所獲施。夫持法太急者，其鋒不可犯而其勢未可乘也，子房不忍忿忿之心以匹夫之力，逞於一擊之間，當此之時，子房之不死者，其間不能容髮，蓋亦危

矣。」吾族衆譜多如所載，謂秦始皇出遊，至博浪沙爲人所擊，大索不獲，疑六國公子陰謀所使，乃下令遍訪六國之遺族，盡屠之。蓋皆不謀而合。

湞陽水木記『韓末釐王支子曰城者，王安時，爲公族大夫，嘗與韓非同秉國政，諫王安勿朝秦，弗聽，城乃退處韓原。及王安被秦虜，國破家亡，城與妻姜氏流寓廬江，操舟爲業。』或以此隱其身也。及始皇遇擊事，秦命循吏密遣胥役潛詰居人姓氏，時城以天氣嚴寒，泊舟河畔，會秦胥役過而詰之，城戲指水曰，此爲吾姓，意以水喻寒，寒諧韓音，原非有所隱也，胥役不悟，復問曰，是姓河耶，城頷之，胥役乃籍之以河而去。既而知爲秦吏所遣，大駭之餘，乃嘆曰，吾家得免刀鋸之禍者，河一字也，豈天啓之乎。惟姓氏當從人，豈從水哉，遂以何爲姓，定籍廬江。廬有山，有匡君平仙跡，出殷周之世，以仙人所止爲廬得名。見後漢書廬江郡志。又古爲廬子國，春秋時，其地屬舒，戰國屬楚，秦屬九江郡，漢曰廬江，晉梁曰合州，隋唐曰廬州，宋曰保信軍，元曰廬州路，屬河南省，明曰廬州府，屬南直隸，至清爲廬江縣，屬安徽省廬州府。

按順德西馬寧何氏族譜序所載；何氏蓋本宋人姓氏辯證一書云，何自姬姓食采於韓，後爲秦滅，子孫散居江淮陳楚之間，以韓爲何，隨聲而變何氏。孫愐唐韻，亦如上述。則未言及秦始皇博浪沙遇擊事及天祐韓城，因易韓爲何姓者，亦姑存之，以佐後賢參考。

順德羊額有明高士何不偕先生不去廬集中，載有得姓初祖詩一首，句云『扁舟來往繡溪津，一字荒唐已避秦，翻覺桃源人更拙，舉家何用絕交親。』當可佐易韓爲何之證也。

史記淮陰侯列傳第三十二；淮陰侯韓信者，淮陰人也。始爲布衣時，貧甚無以立，曾受市井少青袴下之辱，漂母一飯之恩，忍辱負重，以待風雲。初仕楚，不得志。及爲蕭何賞識，力薦於漢高祖，授以上將軍印，統兵數萬，旣而封爲齊王。後以功高震主，被誣反意，降爲淮

陰侯，信自此鞅鞅不樂，常稱病不朝從。漢初十年，鉅鹿太守陳豨反，呂后乘高祖將兵外出，使武士縛信，斬之長樂鍾室，並誅信之三族。乃世有爲信存後，義士匿孤以就蕭何之說，是則韓氏之後，皆多災多難，顛沛流離，若隱原姓而易之曰何，要皆韓氏之後也。

今謹按香山小欖何氏九郎族譜，清乾隆二十年，公元一七五五年纂修，以其較爲詳析，從其物本乎天，人本乎祖，其所由來者遠矣，上追虞夏，下及明清，始得一脈相承，則追遠之思，庶幾無所缺憾之旨。確定廬江世系，何氏源流，備列於後，以期後之覽者光而大之。初祖瑣公，妣姜氏，得天之祐，定籍廬江。廬江多閒田，偕其子曰通，曰适，曰遇，力耕致富，講禮睦鄰，廬人重之。瑣公姜妣皆壽享百齡，葬廬江東鄉望淮岡，世稱何墳岡，至宋代猶存，莊簡公李光過覽，題詩云：『何墳岡上草幽青，七國邊塵尙可驚，姬裔未應灰灼火，呂蛆那怪誤疑冰，川舟百代行人濟，華表千年歸鶴鳴，坏土不隨函谷變，驪山徒自發崇陵。』按李光爲北宋崇寧間進士，官太常博士，卒謚簡莊，爲一代大儒，見於宋史。

二世通祖，生三子，曰采，曰亮，曰齊。三世亮祖生三子，曰叔轟，曰叔森，曰叔圭，兄弟俱以才聞。以避漢吳王濞之亂，乃自廬江徙居桂陽。四世祖叔轟生子曰懼，曰懷。是爲五世，懷祖生三子，曰紹姬，曰紹韓，曰紹獻。曰姬曰韓，蓋不忘本也。

六世紹姬祖，字繼周，妣芊氏，紹姬祖，八歲晨出就塾，途拾一帕，內裹大珠數顆，午還家，見人泣於道旁，祖問其故，泣者曰，吾父被誣陷獄，賣珠救父，忙遺於道，故泣。祖即解還之，及長益力行善，興家立業，時漢武帝平定南粵，關隘無禁，紹姬祖乃由桂陽徙居湞陽，卜築於大慶坊，爰開戶族於五嶺之南，湞陽漢縣名，即今之廣東韶州府英德縣。紹姬祖晚年生三子，曰籌鍾，字禹湞，曰籌錫，字禹祥，曰籌鑑，字禹和。兄弟俱舉孝廉，以孝悌稱於邑里。紹姬祖壽逾百齡，葬鳴絃北山，在曲江縣界，至明代墓址尙存，明洪武

廣東參政汪廣洋過覽，題詩云，『韶嶂峰高肄水深，鎬豐連脈有荒墳，登高遡至疑峩處，新聽鳴絃幾越音。』世傳虞舜南巡，曾鳴琴於此山，時后稷侍聽，稷周祖也，鎬，豐周京也。

汪詩用此典故，蓋以何氏之先，源出於韓，韓氏之先，實宗周武，所以言歟。

八世丹祖，字伯張，乃七世祖籌鍾之子。丹祖八歲通孝經春秋，時稱神童，漢鴻嘉元年舉茂才，官至中散大夫，因忤王莽，被謫松滋令，時松地貧民苦，丹至，去苛政，勸耕耨，政教大行，物阜民豐，卒於官，松民立祠祀之。丹祖生四子，曰縉，曰統，曰結，曰絃。九世縉祖生二子，曰岳，曰雲。十世岳祖生二子，曰顥，曰顯。顥一作容，有待考證。

十一世容祖，字維仰，妣鄧氏。容祖官至東漢荊州主簿，以大慶坊人衆，田舍不足給，乃自湏陽徙居陽山通儒坊。作湏陽水木記，以載初祖城公以來十一世系，爲何氏族譜之始。容祖生二子，曰旦，曰昂。十二世昂祖生二子，曰睢，曰準。十三世睢祖生三子，曰瑗，曰珙，曰璫。十四世瑗祖生二子，曰觀，曰靚。十五世靚祖生一子，曰苗，十六世苗祖生一子曰載。十七世載祖生四子，曰鱣，曰鯈，曰鱗，曰鯨。

十八世鯈祖，字時美，仕晉爲始興郡法曹，時制度失紀，邊郡下吏多濫用非刑，鯈至，即爲奏格，由是以寬仁見稱，民皆德之。鯈生子曰天民，天民生三子，曰景道，景哲，景嘉。

二十一世原忠祖，爲二十世景道祖之子。得天獨厚，壽享一百又四歲，妣劉氏壽享一百又二歲，時人頌之，爲建百歲坊。原忠祖生子四，曰長瑜，曰長瑣，曰長珥，曰長瑞。二十二世長瑜祖，爲南朝宋增城令，有惠政，以性豪邁，好事吟咏，乃棄官而歸。生子一，曰三就，二十三世三就祖生二子，曰郭，曰郵。二十四世郭祖生一子，曰朝臣。二十五世朝臣祖生二子，曰承本，曰承先。二十六世承本祖生一子，曰牧。

二十七世牧祖，字養民，妣吳氏。牧少時見家事常缺，因問於父曰，先世所業者，父曰，廬

江苗裔，耕讀成家耳。牧即立志務本，力田致富。生子四，曰亨，曰信，曰偕，曰修。二十八世亨祖生子三，曰光述，曰光昭，曰光顏。二十九世光述祖，字傳甫，講學當世，四方之士，多集其門，曾捐義田數百畝，以施貧活族。娶周氏，生子曰夢壽。三十世夢壽祖生子二，曰謀，曰言。言自少好讀古名將及循吏傳，爲唐代新州雲浮鎮將軍，有綏奠之功。三十一世言祖生二子，曰徽，曰攸。兄弟和翕，能承先業，先後繼任雲浮將軍。勇斷廉介，爲時敬重，其後裔另開族新州。三十二世徽祖生三子，曰昌期，曰昌祐，曰昌熙。三十三世昌期祖，字伯泰，生而悟毅，通春秋三傳。嘗隨父至雲浮，與峒民獵，有雙虎突出大吼，衆皆驚退，昌期獨挽弓射殺雙虎，以是知名。既而爲陽山統領，名益遠播。天寶十四年，安祿山叛唐，昌期應詔勤王，平亂有功，爲唐衛尉上將軍，進侍中太保，封寧國伯。後以老告辭，歸陽山，首建何氏大宗祠，盡將賜田歸祭業，復會修通譜，紀載自瑣祖始三十三代以來大小宗姚，集廬江，桂陽，湞陽，陽山各地六千餘人。定家約二十餘條，訓示四方族衆，咸皆仰之法之。歿，葬於陽山縣之七拱橋山，妣侯氏同穴。至明季猶存，明廣信衛指揮使朱亮祖鎮廣東過覽，題詩云『采風不見通儒俗，弔古空存太保墳，飛鼓往來傳虎柝，寶泉闔闢透龍濱，雲浮獵後蠻煙淨，雪朔征餘帝里新，壯烈未銷寒夜月，鬱崖常若擁千軍。』

三十四世兄弟十二人，並以文學居祿位，忠孝著聞唐代，時人稱十二相公。並列於下。

鳴珦祖，字子和，昌期祖長子。自少聰睿，通經史，選補宏文館生，授中書舍人，遷史館修譲，及從父南歸，佐父修通譜。旋還任京師，以不阿權勢，乃引疾去位，儀型後進。

鳴瑀祖，字子栗，昌期祖次子。爲衛尉寺少卿。

鳴珮祖，字子節，昌期祖三子。有治才，以國子監生授定陶縣丞，以廉謹著政聲。

鳴瑾祖，字子衡，昌期祖四子。年方十三，即通五經，官歷宏文館生，集賢殿校理。

鳴珪祖，字子信，昌期祖五子。爲桂州司馬。

鳴璋祖，字子玉，昌期祖六子。爲集賢殿校書郎。生母張氏卒，廬墓三年，以孝聞。鳴璫祖，字子冠，昌祐祖長子。八歲能詩，通詩易禮三經，不遺一字，選充崇文館生，嘗侍太子遊。妣區氏，亦才女，能詠。多唱隨之樂。

鳴環祖，字子完，昌祐祖次子。補宏文館生，太子甚禮之，後以私議詔書，被謫歸，遂隱居不仕，主管大宗義田祭產三十餘年，造福家族。

鳴璿祖，字子瑞，昌祐祖三子。以明算理授并州司戶。

鳴璇祖，字子清，昌祐祖四子。以文學爲清陽尉。

鳴璣祖，字子珠，昌祐祖五子。以文學爲雷州典校。

鳴臻祖，字子美，昌熙祖獨子。以明經學授崇文館著作郎。

三十五世庭揚祖，字顯朝，乃鳴璫祖之子。博學通經，選充宏文館生，進任秘書省郎。按舊譜謂鳴璫生庭辨，鳴珮生庭捍，鳴瑾生庭選，鳴珪生庭操，鳴璋生庭侯，鳴璫生如蘭，鳴環生如蕙。其餘各祖嗣續繁多，不能備載，其後各宗姚皆自立譜矣。庭揚祖生二子，曰甸，曰旬。三十六世甸祖，字邦輔，生子四，曰國禮，曰國祚，曰國祥，曰國禎。

三十七世國祚祖，字懋延。奮志窮經，時嶺南節度使開府曲江，聞祖名，聘爲幕賓，以師禮待之，祖與經畫，得佈善政，因徙居曲江。晚年講明三禮，以訓後學。生子曰楷，字仲瑞，唐太和初年，舉進士，廣州刺史聞其賢，聘典州教，以經術啓迪後進，一時科舉名士，多出其門，因徙家番禺。生一子，曰鼎。

三十九世鼎祖，字邦器。年十六，舉唐大中元年進士，初授著作郎，進任瀧州司馬。遷容管

二州經略使，能以德服頑民，使皆投刃歸耕，賣刀買牛，晚歸番禺，修宗譜續牒，以承一世容祖所述之湧陽水木記，與三十三世昌期祖建陽山宗廟之本支世系。

四十世澤祖，字君潤，乃三十九世鼎祖長子。其弟曰漑，曰灌，曰漬。澤少即知學，登後唐同光元年進士，授洛陽令，嘗諫唐莊宗止獵以利民耕稼，見新五代史卷五十六。澤祖生二子，曰旭，曰昶。旭祖隱居不仕。昶祖爲後周御史參軍，時守雄州，雄韶連陽之間，盜賊瀰漫。昶奉命征剿，舟次遇龍捲風，溺水殉職。雄州民人嘉其忠義，乃立廟崇祀，追贈清海軍節度使殿前御史。生二子，曰迥，曰邁，由此開宗雄州，至宋稱南雄州。

四十二世迥祖，與弟邁祖，並以孝著，定居南雄，以生以聚。迥祖生四子，曰範，曰模，曰存，曰著。四十三世範祖生子曰弼。四十四世弼祖字時佐，力行古禮，建南雄宗廟。弼祖生子曰任重。四十五世任重祖生二子，曰伯達，曰伯逢。是爲四十六世。

四十六世伯達祖，字道行，六歲失恃，事繼母至孝。志於學，洞經籍，爲宋代端溪令。嘗光宗之願，以廉明著世。伯達祖生四子，曰勳，曰煦，曰照，曰然。四十七世照祖生子曰西傑。四十八世西傑祖，字周英，學有淵源，不徇時好，授欽州錄事，有綏定邊隅之功。生子曰明允。四十九世明允祖生三子，長曰棠，次曰橐，三曰渠。

按別譜四十三世模祖生二子，曰綺，曰繡，四十四世綺祖生一子，曰旦。四十五世旦祖生一子，曰庚申。四十六世庚申祖生二子，曰仲愷，曰仲愷。四十七世仲愷祖生子，曰應齡。四十八世應齡祖生三子，曰利廣，曰利雄，曰利方。是爲四十九世。

五十世橐祖，字文縉，號北齋，生於宋哲宗元祐六年，即公元一零九一年。與兄棠祖，弟渠祖同登宋徽宗政和五年進士，世稱三鳳。橐祖進士第一，狀元及第。時金人入寇，橐祖力主戰，官拜尚書右僕射，以康王爲天下兵馬大元帥，協力抗金，及金人陷京師，隨徽欽二

帝被擄至燕山金營。凟祖以君辱臣死，乃北嚮號哭七日，不食而卒，年僅三十九。及宋高宗南渡，建都金陵，追贈大學士，官其家七人。見宋史卷三百五十三。凟祖德配趙氏，乃宗室公主，生二子，長曰雍，次曰熙。雍生八子，熙生二子，皆承蔭爲郎官。棠祖之裔，分居惠州，番禺沙灣等處。渠祖之裔，則分居順德黃連，馬寧等處。

五十一世雍祖，字伯堯，號梧窓。妣麥氏，生八子。熙祖，字仲堯，號芸窓，生二子。雍祖長子曰貴一郎，名秀，字修己。宋封施仁郎。後嗣居新會。

熙祖長子曰貴二郎，名琛，字季三。宋封宣義郎。後嗣居南海。番禺。順德馬寧桂洲。熙祖次子曰貴三郎，名琰，字遜楫。宋封達禮郎。後嗣居南海。順德水藤。

雍祖次子曰貴四郎，名琪，字國禎。宋封廣智郎。後嗣居增城。

雍祖三子曰貴五郎，名瓊，字文行。宋封忠信郎。後嗣居增城。順德黃連。

雍祖四子曰貴六郎，名瓊，字雍睦。宋封慈溫郎。後嗣居番禺。高要。

雍祖五子曰貴七郎，名珩，字種德。宋封慎良郎。後嗣居東莞。

雍祖六子曰貴八郎，名琚，字仲孫。宋封隱恭郎。後嗣居新會。龍門。

雍祖七子曰貴九郎，名球，字蔭祖。宋封純儉郎。後嗣居香山。東莞，南京。

雍祖八子曰貴十郎，名琳，字啓謀。宋封敬讓郎。後嗣居香山。龍門。

溯吾何族自城祖以迄雍熙二祖，世逾五十，祖功宗德系列，子孫蕃衍。由安徽廬江以至廣東南雄，地歷數遷。南雄有珠璣巷，宋代仕宦多居於此。按明末番禺詩人屈翁山著廣東新語；珠璣巷得名，始於唐張昌，世爲南雄敬宗巷孝義門人。其始祖轍，生子興。七世同居。晚唐寶曆元年，朝庭聞其孝義，賜與珠璣條環以旌之，避敬宗廟諡，因改所居爲珠璣巷。其後；宋理宗紹定年間，公元一二二八年。有貴嬪蘇氏者，獲罪見謫，潛出宮禁，逃匿民間。時有

黃貯萬者，爲南雄郡始興縣牛田坊富民，因運糧入都，至關口停船，晚間有歌妓與之鄰泊，相見而悅，遂與携歸作箕帚妾，而不知其即蘇嬪也，易姓胡氏，鄉人莫知其由者。越數月，上覺，嚴敕搜訪之下，廷臣賈似道藉辭誣奏始興縣匪黨煽亂，請旨芟夷其地。因是南雄各地居民，懼禍患之株連。吾族先世乃與九十七戶人家，編竹木爲筏，渡江南下，本末如此。

復按番禺沙灣廬江族譜所載南雄譜系：五十世棠祖生九子，長曰德臨，次曰德載，三曰德延，四曰德全，五曰德高，六曰德御，七曰德容，八曰德方，九曰德洪。棠祖生二子，傳十孫，各譜所載皆同，但有誤以棠祖之子名，作棠祖之孫名者。渠祖之裔不詳，祇載居順德黃連馬寧等地而已。棠祖之孫，十郎兄弟後裔居處，亦所載各有小異。茲按番禺沙灣以棠祖長子五十一世德臨祖爲始祖，妣周氏。祖少習春秋，有經濟志。爲宋代大觀初年轉運使，授南康州參軍，有足食政績，秩滿家居，壽九十，葬平田岡，今德慶州。至玄孫人鑑始居沙灣。南海疊澗家譜：爲茶基房。世系於廬江書院合族通譜六郎之裔孫，蓋宗於棠祖也。原自南雄徙居南海華平村，至七世太源祖始再遷疊澗，是爲該地始祖。按廬江書院在廣州。

香港順德水藤何厚本堂宗親會會刊；謹按廬江書院全撮錄五十傳，厚本堂大宗祠奉棠祖爲首座。棠祖生雍、熙。熙生貴二郎，貴三郎。貴三郎生于芬，于芳。于芬生清，慎，勤。慎生柰，喬，楚，梓。梓生祖受，祖善。祖受生秀源，有卿，俊卿，文俊。文俊號南廓，於明代洪武初年，與兄俊卿自南海河清徙居順德水藤。俊卿無後，南廓本支百世，爲始遷祖。

順德西馬甯何氏族譜；太祖棠公，乃城公五十世孫。祖妣趙氏，乃宋宗室，生二子，長諱雍，配秦氏，生八子。次諱熙，號文廣，又號芸窓，配張氏，生二子。時宋高宗南渡，雍熙兄弟遷於南雄沙水里珠璣巷居焉。文廣公於南渡後，且逢有匿妃之釁生，子孫始遷廣城，爲南海人。歷經四傳，至宋末景炎年間，又播遷馬寧。故順德西馬寧以棠祖次子熙爲始祖。

順德羊額有明高士何不偕先生所著不去廬集卷二所載，有家先賢傳凡五章，今敬錄其第一章

始祖侍御公傳

祖諱昶，又諱楚。父曰澤，兄曰旭，自曾祖州校公，已徙居郡城。澤以直諫事唐莊宗明宗兩朝，官至太常卿。是時劉氏僭號嶺南。明宗賜第河陽，祖布衣時，隨侍子舍石敬塘，尚長公主嘗與之遊，敬塘知其賢，輒善遇之。迨太常卒，祖與旭奉喪南還，旭即隱居不仕。祖爲人志念深沉，素以經濟自許，且奉太常遺命，耻臣南漢劉氏，告車趣駕復返河陽，而石氏已即皇帝位，是爲後晉，聞祖至大喜，即拜給事郎，任以國政，旋拜侍御史。祖感知遇，屢進讜言，爲上所重。未幾而高祖晏駕，齊王與契丹啓釁，切諫弗聽，遂託疾去位，亡匿徐州山中，然未嘗一日忘故土也。至後周顯德初，南唐旣奉正朔，南漢猶竊據嶺海，信仇如故。二年乙卯，世宗用比部郎中王樸議，強起祖爲南海參軍，持節諭南漢，祖亦久欲取道來歸。並攜家累行至漢邊，而劉晟方事誇張威名，不欲國人知有中朝之命，乃令邊吏授館於雄州，會雄，韶，湞，連間，盜賊瀰漫，民不聊生。晟乃借祖帥戎征討，屢至平定，方隅寧謐，復引兵西擊楚寇，舟至韶陽灘，值龍起風雨，波濤暴作，舟盡覆，祖與妣皆沒，其遺骸並逆水上流三十餘里，諸子葬於庾嶺上巾山，雄人感祖功德神異，立廟致祀於下沙里，水旱疾疫，禱無不應，宋熙寧間，南雄刺史李宗儀，以事上聞，神宗詔贈清海軍節度使殿前侍御史，妣戴氏，贈清海夫人，賜額忠義何公廟，有司以時致祭。祖歿後十七載，宋開寶四年辛未，（公元九百七十一年）孫世忠，妻李氏，捐粟餉軍二月，擒劉鋹，南漢滅。

不去廬集卷十并載詩云『嶺頭七度薦杯羹，劍履威嚴耀兩楹，昨日韶陽灘上過，浪聲猶似不平鳴。』此蓋不偕先生第七度往祭忠義何公廟之作也。按今順德羊額奉昶爲始祖，而昶生逢五代干戈之際，其先世可溯自晚唐於粵北曲江流播番禺，傳內言『已徙居郡城』蓋指此也。

何氏歷代先賢傳略

漢、公元前二零六年至公元二二零年，中經王莽之亂，故公元七年前爲西漢，公元二十五年後爲東漢，或稱後漢。

何比干，字少卿，西漢，平陵人。經明行修，通法律，武帝時官丹陽都尉，獄無冤囚。嘗門外有老嫗，年可八十餘，頭白，求寄避雨，雨甚而衣履不霑漬。雨止，送至門，乃謂比干曰，公有陰德，今天錫公策，以廣公之子孫，因出懷中符策，其狀如簡，長九寸，凡九百九十以授比干，復曰，子孫佩印綏者當如此也。比干前後果生九子，西漢本始元年，即公元前七十三年，自汝陰徙居平陵，代爲名族。見後漢書卷四十三，何敞傳，附載何氏家傳所記。

何武，字君公，西漢，蜀郫縣人。兄弟五人，皆爲郡吏。初，武爲郡吏時，事太守何壽，壽知武有宰相器，善視之。武爲人仁厚，好進士，獎稱人之善，及爲御史大司空，與孔子第十四世孫丞相孔光，共輔成帝，哀帝。後遭王莽陰誅不附己者，郡國豪傑坐死者數百人，武知難免，乃自殺。見漢書卷八十六。

何並，字子廉，西漢，平陵人。成帝時爲長陵令，潁川太守，抑豪強，表彰善士，有政聲，道不拾遺，惡者亡去。並平生清廉，妻子不至官舍，病，將卒，召丞掾作書告其子恢曰，吾生素餐日久，死，雖當得法賙，勿受，葬爲小椁，賣容下棺。恢謹如父言，史稱其節。見漢書卷七十七。

何敞，字文高，東漢，扶風平陵人，何比干之六世孫。敞性直，自以趣舍不合時務，每召，常稱疾不應。元和間，竇氏專政，外戚奢侈，嘗奏記於太尉宋由，力言爲政以節省浮費，賑卹窮孤之要。官拜侍御史，尚書，論者以其有助鋤姦挽瀾之功，而平呂霍之變。見後漢

書卷四十三。

何休，字邵公，東漢，樊人。爲人質樸口訥，善曆算，精研六經，當世儒士，無有及者。太傅陳蕃召用之，與參政事，進退以禮。及受陳蕃失勢之累，坐廢錮。乃覃思著述，不窺門者十七年，所作春秋公羊解詁，注訓孝經，論語等書，皆經緯典謨，不與守文同說，世傳爲何氏之學。禁解，復拜議郎，晉諫議大夫，屢陳忠言，心存君國。見後漢書卷七十九。
何顥，字伯求，東漢，南陽襄鄉人。少遊學洛陽，顯名太學。與陳蕃李膺甚善，及蕃與膺失勢，遂爲宦官所陷，亡匿汝南荆豫之間。至黨錮解，受任司空府，職累遷。迨董卓秉政，誘以爲長史，託疾不就。乃與司空荀爽，司徒王允等共謀倒卓，事不成，遂憂憤而卒。見後漢書卷六十七。

何皇后，東漢，南陽宛人。以選入掖庭，生皇子辯。靈帝光和三年，方爲皇后。追封其父何眞爲車騎將軍，封其母爲武陽君。兄何進爲潁川太守，河南尹。見後漢書卷十下。

何進，東漢，南陽宛人。何皇后之異母兄。時黃巾賊起，拜進爲大將軍，率軍衛鎮京師，以功封慎侯。及靈帝崩，皇子辯即位，以主幼，宮廷內外不安，進謀誅宦官，爲國家除患，不密，反爲所害。使董卓有兵入洛陽之機，廢少帝辯，立庶子協號爲獻帝，何氏遂亡，而漢室亦自此敗亂。見後漢書卷六十九。

何苗，東漢，南陽宛人，大將軍何進之弟。靈帝中平四年，滎陽賊起，攻燒郡縣，進遣苗將兵出擊，苗攻破賊羣，平定而還。帝詔使者迎於成臯，拜苗爲車騎將軍，封濟陽侯。苗勇而知方，嘗勸進以處國家之事，須內省外和，惜進未能納其忠言，至苗亦不免死於董卓之禍。見後漢書卷六十九。

何熙，字孟孫，東漢，陳郡人。少有大志，不拘小節，官御史中丞，晉大司農，歿於征戰軍

中，以忠孝傳家。有子三人，臨，瑾，阜，並有政能，光大家聲。見後漢書四十七。

何夔，字叔龍，東漢，陳郡夏陽人，乃大司農何熙之曾孫。幼喪父，與母及兄居，以孝友稱於世，避亂淮南，袁術欲羅致，夔以述無大用於天下，乃不應，寧遁跡山林。後仕魏，位至文帝太傅。子何曾，仕晉，位至太尉。孫何劭，亦仕晉，位至尚書左僕射，世代卿相。惜劭有乃父之風，奢豪益甚。見三國志魏書卷十二及晉書卷三十三。

魏，漢末三國之一，公元二二零年，篡漢，至公元二六五年，禪於晉。何平叔，名晏，魏，南陽人。乃東漢大將軍何進之孫。少以才秀知名當世，好老莊言，競尚清談，士大夫多效之，成一時之風尚。著有道德論，論語集解，及文賦數十篇傳世，官至侍中尚書，受知於大將軍曹爽，及與爽同謀，爲司馬懿所殺。見魏書卷九。

晉，公元二六五年受魏禪起至公元三一七年爲西晉。公元三一七年至公元四二零年爲東晉。何攀，字惠興，西晉，蜀人，宅心平允，居官整肅，嘗斷疑獄，申明曲直，惡樹黨濫權，官至西城侯，食邑萬戶，賜絹萬匹，攀讓其半，以給戚族，史稱其義。見晉書卷四十五。何皇后，諱法倪，東晉，廬江灊人，乃尚書令，左將軍何充之姪女。以名家膺選，穆帝升平元年立爲皇后。有坤德，而無子，及穆帝崩，帝之從弟即位，是爲哀帝。尊稱穆皇后，居永安宮，及桓玄篡位，被降爲零陵縣君，終年六十六。見晉書卷三十二。

何充，字次道，東晉，廬江灊人，世代公卿，曾祖何禎，光祿大夫。祖何惲，豫州刺史。父何叡，安豐太守。充風韻儒雅，器局方概，具萬夫望。官歷東陽太守，會稽內史，吏部尚書，護軍將軍，尚書令，左將軍，出將入相，以社稷爲己任。晚年性好釋典，崇修佛寺，糜費過巨，因頗受微議。見晉書卷七十七。

何準，字幼道，東晉，廬江灊人，乃穆皇后之父，位居宰輔何充之弟也。準高尚寡欲，弱冠

知名，不以世出公卿門第，而視富貴如浮雲，因乃散帶衡門，唯誦佛經，修營塔廟而已。

卒年四十七，追封晉興縣侯。子惔，官至南康太守。孫元度，西陽太守。次孫叔度，太常卿，尚書。見晉書卷九十三。

南北朝，公元四二零年至公元五八九年。南朝有宋，齊，梁，陳。北朝則有北魏，東魏，西魏，北齊，北周。陳在最後滅於隋。

何尚之，字彥德，南朝宋，廬江人。曾祖何準，晉穆皇后父。祖何惔，官南康太守。父何叔度，官歷金紫光祿大夫，吳郡太守，尚書，恭謹廉潔，爲宋循吏。尚之少時頗輕薄，好摴蒲，既長，折節蹈道，雅好文義，官歷臨津令，中書侍郎，尚書吏部郎，中書令。位極顯貴而恭敬謹約，車服率素，妻亡不娶，又無姬妾，與少時若兩人。弟悠之，義興太守。愉之，新安太守。翌之，都官尚書。見宋書卷六十六。

何偃，字仲弘，南朝宋，廬江人，中書令何尚之之子。宦歷丹陽丞，中書郎，吏部尚書，襲先人之餘蔭，世以爲榮。平生喜談玄理，注有莊子逍遙篇傳世。見宋書卷五十九。

何承天，南朝宋，東海郯人。五歲喪父，賴母徐氏撫孤成人。承天聰明好學，諸子百家，莫不博覽。叔父何盼，爲益陽令，乃隨叔父入仕途，官至御史中丞，領國子博士，撰國史。復擅奕棋，能彈箏，嘗受上賞賜。見宋書卷六十四。

何佟之，字士威，南朝齊，廬江人，晉豫州刺史何惲六世孫。宋員外散騎常侍何邵之之孫。

佟之少好三禮，師心獨學，強力專精，手不輟卷。初仕齊，爲國子助教，委曲透誨，繼爲鎮北記室參軍，侍皇太子講授。時都下碩儒，獨推佟之一人。後仕梁，爲尚書左丞，所著文章禮義百餘篇傳世。見梁書卷四十八。

何昌寓，字儼望，南朝齊，廬江人，何佟之之子。昌寓少而淹厚，通和汎愛，不雜交遊，士

君子多稱之，初仕宋，官歷司徒東閣祭酒。後仕齊，任吏部尚書。見南齊書卷四十三。

何遜，字仲言，南朝梁，東海鄒人。宋御史中丞何承天曾孫。宋員外郎何翼孫。齊太尉中軍參軍何詢子。遜八歲能詩，弱冠州舉秀才，南鄉范雲見其對策，大爲稱賞，因與結忘年之交。自是遜一文一詠，雲輒嗟賞，且謂所親曰，縱觀文人有作，質則過儒，麗則過俗，其能含清濁，中古今者，見之何生而已。時當代大儒，尚書僕射沈約亦愛其文，嘗謂遜曰，吾每讀卿詩，一日三復，猶不能已。其爲名流稱重如此。遜以學優致仕，官歷水曹行參軍，尚書水部郎，世稱爲何水部。見梁書卷四十九。

何思澄，字元靜，南朝梁，東海鄒人。父敬叔，齊征東錄事參軍，餘杭令。思澄少勤學，工文辭，官歷南康王侍郎，安成王左常侍，兼太學博士，遷治書侍御史。與宗人遜及子朗俱擅文名，時人稱爲東海三何。子朗官歷員外散騎侍郎，國山令。思澄辭文典麗，著有文集十五卷，遊廬山詩，釋典詩等傳世。見梁書卷五十。

何敬容，字國禮，南朝梁，廬江人。齊吏部尚書何昌寓子。敬容以世家貴胄，齊武帝以女長城公主妻之，拜駙馬都尉。後仕梁，官至吏部尚書，尚書令。何氏世代，自晉何充，宋何尚之，皆篤信佛法，建立塔寺，至敬容更捨宅爲伽藍。時梁武帝駕幸同泰寺宣講金字三慧經，特許敬容參聽其朔望禮佛。見梁書卷三十七。

何之元，南朝陳，廬江人。初仕梁，官安西刑獄參軍，及侯景之亂，梁武帝被困臺城餓死，梁便尋滅，乃轉仕陳，但心懷故國，未幾而屏絕仕途。銳精著述，作梁典凡三十卷，以志梁國興亡之運，盛衰之迹，定褒貶，垂戒後世。見陳書卷三十四。

隋，公元五八一年代北周爲帝，至公元五八九年滅陳統一天下，至公元六一八年而亡於唐，國祚僅三十八載。

何妥，字鳳栖，隋，西城人。父何細胡，通商入蜀，遂家郫縣，因至巨富，時有西州大賈之譽。妥少聰穎，八歲遊國子學，師有難之，常應對如流，初仕周，爲太學博士。及隋文帝受禪，加通直散騎常侍，進爵爲公。妥嘗對文帝曰，臣先人每誠臣云，唯讀孝經一卷，足可立身經國，何用多爲。文帝然之。妥傳世之作，譏周易講疏三卷，孝經義疏二卷。見隋書卷七十五。

何稠，字桂林，隋太學博士之姪。父何通，善劉玉。稠天生聰明，初隨叔父何妥仕周，未展其志，及隋受禪，稠以平亂有功，信服蠻夷，隋帝重用之，官歷左屯衛將軍，光祿大夫，工部尚書。見隋書卷六十八。

唐，公元六一八年至公元九零六年。中經武則天於公元六九零年稱帝改國曰周，迨至公元七零五年，唐中宗復國爲唐。

何進滔，唐，靈武人。世代干城，曾祖父何考物，祖父何俊，皆爲本州軍校，父何默，夏州衙前兵馬使。進滔承先世蔭，贈左散騎常侍，旋任衙內都知兵馬使。以功授兼侍御史，曉暢韜略，軍衆嘗連聲而呼曰，得衙內都知兵馬使何公，即三軍安矣。故大得民情，累官至司徒。卒，追贈太傅。見舊唐書卷一百八十一。

何弘敬，字重順，唐，靈武人，何進滔子。事母至孝。唐武宗嘗憐其連年征戰，在軍日久，予以定省之假。以功官歷東面招討使，檢討尚書左僕射，加同中書門下平章事。至唐懿宗初年，兼中書令，封楚國公，咸通七年卒，追贈太師。見新唐書卷二百一十。

何全皞，唐，靈武人，何進滔孫，何弘敬子。以世襲拜節度使。唐懿宗嘉其平亂有功，官遷檢校司空，同中書門下平章事，力能繩其祖武，惜余皋英年得志，好殺戮，下有小罪，解加縱貸，以至人人危懼，怨其執法過嚴，至軍中起謠言而衆叛，全皋單騎遁走，卒遭殺，

時咸通十一年，上憐之，詔贈太保。見新唐書卷二百一十。

何蕃，唐，和州人。事父母至孝，志潔行方，授太學，數歲始一歸。嗣以親且老矣，不能自安，乃備揖諸生而去，爲諸生堅留而止。初，朱泚反，諸生將從亂，蕃動以大義，故六館之士，無受汙者。蕃居太學二十年，有死喪無以歸者，必助之。見新唐書卷一百九十四。何易于，唐，不詳何處人。爲益昌令；愛民如赤子，常杭州官橫徵暴斂，某大吏曾語之曰，天子詔，何敢拒。對曰，吾豈敢愛一身，以移暴於民乎。觀察使素賢之，故不忍劾之也。易于當民有死喪不能具葬者，輒自於俸餘助之。召高年者坐，以問政之得失，凡鬪民在廷者，易于常丁寧指曉其誰枉誰直，公正廉明，故獄中三年無一囚。後遷羅江令，刺史裴休嘗至其邑，導侍不過三人，佩其廉約。故世稱循吏。見新唐書卷一百九十七。

何皇后，唐，梓州人。系族不顯，當唐昭宗爲壽王時，以侍東宮，婉麗多智，因得壽王恩遇甚厚，及即帝位，號爲淑妃，旋冊立爲皇后。惟晚唐時代，經朱泚，黃巢等之亂，國家大傷元氣，繼爲權臣朱全忠逼昭宗東遷，以致帝后相抱而泣，及帝遇弑，全忠立帝之子李祝爲哀帝，復逼禪位，縊太后，唐遂亡。見新唐書卷七十七。

何仲宣，唐，不詳何處人。爲初唐武德貞觀間詩人，精韻律，善唱酬。其入選全唐詩有七夕賦詠一首云「日日思歸勤理鬢，朝朝佇望懶調梭。凌風寶扇遙臨月，映水仙車遠渡河。歷歷珠星疑拖珮，冉冉雲煙似曳羅。通宵道意終無盡，向曉離愁已復多。」蓋客中借物抒懷之作也。見全唐詩第三十三卷。

何仙姑，名瓊，唐，廣東增城人，父何泰。瓊生於初唐開耀間，時公元六百八十一年。生時紫雲繞室，性柔靜簡淡，有孝行。所居近羅浮山，地產雲母，旁有井，嘗夢老人授以服食雲母法，時如之，行爲多異常人。父母懼，私爲擇配，瓊於親迎前夕，留詩硯間而去。其

詩云『麻姑怪我戀塵囂，一隔仙凡道路遙，去去滄洲弄明月，倒騎黃鶴聽鸞簫。』復頗多靈異之跡，流傳民間，鄉人因稱之曰仙姑，即以所居地祠祀之，今名曰會仙觀。見廣東文徵第三册卷十二明毛紹齡譏何仙姑傳。一說載何仙姑，唐零陵女子，名瓊，住雲母溪，年十四五，夢神人教食雲母粉，復遇異人與桃食之，遂不飢，往來山頂，其行如飛，能預知人事，唐景龍中仙去，世稱爲八仙之一。見中文大辭典按（湖南）零陵縣志。

五代，後唐，後梁，後晉，後漢，後周，公元九零七年至公元九六零年。

何昌齡，後唐，不詳何處人。官歷廬陵宰，琴堂多暇，詩酒唱酬，有題楊克儉池館一首『經旬因雨不重來，門有蜘蛛徑有苔，再向白蓮亭外望，不知花木爲誰開。』見全唐詩第七百五十七卷。

何澤，後唐，廣州人。父何鼎，於唐末爲容管經略使。澤少好學，長於詩歌，舉進士，爲洛陽令。時唐莊宗好爲畋獵，數踐民田。澤敢於當馬諫之，力陳天下未定之勢，應多行仁政德教，無害於耕。莊宗爲之動，乃止畋獵。澤以此拜倉部郎中。莊宗崩，其義子李嗣源繼位，是爲明宗。時民苦於兵，歲多饑饉，澤數上書言事，明宗嘉之，晉吏部郎中，史館修撰。見新五代史卷五十六。

何瓚，後唐，閩（今福建省）人。唐末舉進士及第。當唐末代皇朝哀帝時，晉王李克用子李存勗爲太原節度使，任何瓚爲判官。瓚爲人明敏，通於吏事，外若疎簡而內頗周密。存勗每出征伐，常留瓚代知留守事，委以重託。及存勗殺朱全忠滅梁，建都於鄆，是爲後唐，稱位唐莊宗，拜瓚爲諫議大夫。莊宗崩，明宗立，任瓚爲西川節度副使，後改行軍司馬，忽忽不得志。蓋當時權臣太尉兼中書令孟知祥攬政，存有二志，瓚無能爲力，以制其害，乃憂憤而卒。後孟知祥竟篡後唐即皇帝位，國號曰蜀。見新五代史卷二十八。

何建，後晉，原籍迴鶻，徙居雲朔之間。祖父何慶，父何懷福，俱任後唐小校。建少以謹厚稱，隸屬於後唐重臣石敬瑭帳下，以掌廄爲役。後敬瑭因事而被削奪官爵，敬瑭不甘於雌伏，乃稱帝於晉陽，自立爲大晉皇帝，大封隨從。建以累典禁軍，乃遷曹州刺史，延州兵馬留後，尋正授旄鉞，數年之間，歷涇，鄧，貝，澶，孟五鎮節度使，顯赫一時。見舊五代史卷九十四晉書二十。

何福進，字善長，後周，太原人。父何神劍，累贈左驍衛大將軍。福進少從軍旅，以勇猛知名。初任後唐宿衛軍校，會唐莊宗寵任伶官郭從謙，從謙居心叵測，兵圍大內，福進乃奮身拒戰，莊宗雖突圍，但重傷駕崩，從此亂亡相繼，後唐江山不保。福進乃轉仕周，任北面行營馬步都虞侯，尋拜曹州防禦使，檢校太保，以功至忠武軍節度使。見舊五代史卷一百二十四周書十五。

宋，公元九六零年至公元一二二六年爲北宋，歷史爲靖康之難，金人破汴京，擄徽欽二帝而北宋亡。公元一二二七年宋高宗南渡，建都於金陵（今南京）。至公元一二七九年，陸秀夫負宋帝昺蹈廣東厓門海死爲南宋。合三百二十年。南宋時代，長江之北，爲金人天下，金先南宋而亡於元。

何繼筠，字化龍，宋，原籍太原，徙居河南。父何進福，歷仕後唐後周，累官至忠武軍節度使。繼筠幼時與羣兒戲，必分行伍作戰陣之象。及長，初亦仕後周，任署衙內都尉，以功領欽州刺史，後隨父何福進入朝，爲內殿直都知。福進卒，繼筠以屢建戰功，官至西北面行營都監。及宋太祖受後周禪帝位，亦爲宋大破并人，力拒契丹，深受宋太祖嘉許，拜爲建武軍節度使。疾，疽發背，太祖駕幸其第，錫賚甚厚。卒，太祖臨其喪，爲之流涕而謂侍臣曰，繼筠捍衛邊陲有功，良可惜也。喪禮備極榮哀。繼筠生平，深沈有智略，前後備

邊役二十年，與士卒同甘共苦，得其効忠死力，復善揣邊情，使邊人畏伏，繼筠死，邊人因多畫像祠祀之。子承矩，承睿，皆能繼起將門，流芳簡冊。見宋史卷二百七十三。

何承矩，字正則，宋，何繼筠子。初爲棣州衙內指揮使，以平賊有功，知河南府，復知府潭州，政通人和，囹圄屢空，得朝廷嘉許，領潘州刺史，命護河陽屯兵。及真宗嗣位，關心防務，乃遣知雄州，並詔之曰，卿任居邊要，洞曉詩書，凡有事機，必能暢究。承矩果如所言，不負重託，州民乃多德之。契丹遣使奉幣入貢，承矩以朝廷待邊人之禮撫之，行之悠久。及卒，沿邊州郡之民，皆相率詣雄州發哀飯僧，致其悼念。承矩有子四，龜齡爲侍禁。昌齡，九齡爲殿直。遐齡爲齋郎。昌齡子象中爲閣門祗候。見宋史卷二百七十三。

何蒙，字叔昭，宋，洪州人。少精春秋左氏，著有兵機要類十卷，又擅詩文。真宗時，因上書請開淮南鹽禁，遭受排抑，降出知梧州，旋復任水部郎中，嗣加太府少卿，未幾知太平州，又知袁州。州民多採金爲業，蒙請以代租稅，朝廷不許，乃徙濠州，六年，上表謝事，授光祿少卿致仕，命未下，卒，年七十七。見宋史卷二百七十七。

何中立，字公南，宋，許州長社人。進士及第，工於文詞，雅愛益酒，性倜儻機警。歷官大理評事，殿中丞，太常博士，祠部員外郎，知開封府，龍圖閣直學士，進樞密直學士。見宋史卷三百零二。

何郯，字聖從，宋，原籍陵州，徙居成都，進士及第。仁宗時，以直諫見稱，不阿權勢。仁宗曾戲之曰，古有碎首而諫者，卿能之乎。郯對曰，古者君不從諫，則臣有碎首，今陛下從諫如流，則臣何敢掠美而歸過於君父也。仁宗益喜之，歷官太常博士，監察御史，殿中侍御史。見宋史卷三百二十二。

何正臣，字君表，宋，臨江新淦人。天生聰明，九歲舉童子試，賜出身，復舉進士及第。學

優而仕，歷官侍御史知雜事，知潭州府，知宣州府，刑部侍郎。時神宗下詔各州縣民，聽民以家貲易鹽，吏或推行失當，反無益於民。正臣乃上書陳其利弊，朝廷納其議論，遂寢之，民以爲便。見宋史卷三百二十九。

何執中，字伯通，宋，處州龍泉人，進士及第。任台，亳二州判官。亳州政務，歷久不治，曾數易其官，皆無功而退，獨執中一赴任，事無大小，凡奇異未決之案，皆親處判無誤，因著政聲。旋入爲太學博士，五王就傅，作帝王之師。及端王即位，是爲徽宗。乃晉拜寶文閣侍讀，工部吏部兼侍讀。及蔡京被解相印，徽宗賜執中白玉帶，正宰相官名，封榮國公。執中雖居富貴，未嘗忘貧賤之時，斥緡錢，置義莊，以濟宗族。性復謹畏，在任時，嘗戒邊吏勿生事，重改作，惜人材，寬民力。疾卒。徽宗駕幸其家，恨不及視其病，輟朝三日，追贈太傅。見宋史卷三百五十一。

何凾，字文縝，宋，仙井人，徽宗政和五年，公元一一一五年狀元及第，擢秘書省校書郎，遷中書舍人兼侍講。徽宗數從咨訪，欲以付言責，或謂凾與蘇軾爲鄉黨，宗其曲學，究非大器。乃出知遂寧府，已而回任御史中丞。欽宗立，仍其位，繼晉翰林學士尚書右丞，中書侍郎。時金人虎視中夏，強逼割三鎮之地，大臣多議論從其請，以息戰禍，獨凾一人以爲不可，曰，河北之民，皆吾赤子，棄地則并其民棄之，豈爲作民之父母之意哉。欽宗頗悟，乃罷唐恪爲相。而拜凾爲尚書左僕射兼中書侍郎，以康王爲天下兵馬大元帥，與金人戰，不敵，京城失守，隨徽欽二帝被擄至金人帥營，君辱臣死，凾仰天大慟，不食而卒，年僅三十九。及宋高宗建都金陵，追贈大學士，官其家七人。見宋史卷三百五十三。

何灌，字仲源，宋，開封祥符人。武選登第，爲河東從事，善射術，有神射何巡檢威名。常使邊賊異族，望風而遁。爲河東將時，遇夏人，鐵騎來追，灌禦之，箭無虛發，所中皆徹

甲，至洞胸出背，疊貫後騎，敵懼而引卻。以功歷任知寧化軍，徙熙河都監，領威州刺史，廓州防禦使，屢爲邊防効命，奮不顧身。至靖康元年間，金人大軍南下，直叩京城，灌於是役，背城拒戰凡三日，受重創，歿於陣，年六十二。長子何薈，亦以戰從父，箭貫左臂，不治而亡，同赴國難。見宋史卷三百五十七。

何鑄，字伯壽，宋，餘杭人。登進士，初官州縣，操履勁正，乃受知於御史中丞廖剛。剛薦鑄於徽宗，即命對。鑄陳言曰，動天之德莫大於孝，感物之道莫大於誠，誠孝既至，則紹大業，復境土，又何難焉。帝嘉納之，拜爲監察御史，殿中侍御史，擢右諫議大夫，尋拜御史中丞。會大將岳飛有戰功，爲金人所忌。而向力主和議者秦檜，則惡其異己，且懼若主戰者勝，則主和議者禍必至矣，乃陷之以計，逮岳飛於大理獄。時經由鑄鞫之，鑄引飛至庭，詰其反狀。飛袒示背有舊涅，盡忠報國四字，深入膚層。旣而閱實深究，鑄乃察其冤，以告於檜，檜語塞，隨諉之曰，此上之意也。飛乃死獄中，其子岳雲斬於市。權臣當道，鑄自此居於劣勢，被謫徽州，居數月，憂國而卒。見宋史卷三百八十。

何異，字同叔，南宋，撫州崇仁人。登進士，有詩名，著有月湖詩集行世。初官石城主簿，知萍鄉縣，有政績，丞相周必大喜之。時高宗已禪位於孝宗，必大乃薦於孝宗，乃遷國子監主簿，擢監察御史，至工部尚書。見宋史卷四百零一。

何涉，字濟川，南宋，南充人。祖，父皆業農，涉始讀書，晝夜刻苦，汎覽博古，上自六經諸子百家，旁及山經，地志，醫卜之術，無所不學，一過目不復再讀，而終身不忘。人問書傳中事，必舉卷第冊頁在，驗之皆果然。登進士，初官洛交主簿，改中部令。范仲淹一見奇之，薦爲彰武軍節度推官，遷著作佐郎。嗣邊陲告急，軍中籌畫，涉多貢獻。正仕途得意之時，涉以親老矣，非人子自便之時，乃拜章請求歸里，遂知漢州，合州，以父喪罷

官而歸，不復仕而卒。涉生平長厚有操，事親至孝，平居未嘗談人之過，所至多建學館。勸誨諸生，從之游者甚衆，雖在軍中，亦常爲諸將講論左氏春秋，狄青等輩皆展卷以聽。

著有治道中術，春秋本旨，廬江集七十卷行世，名重儒林。見宋史卷四百三十二。

何基，字子恭。南宋，婺州金華人。父何伯贊，爲臨川縣丞。基沈潛經學，淳固篤實，絕類漢儒，爲朱熹再傳弟子。謝絕仕途，以布衣講學當世，授人以立志居敬之旨。凡有執贊爲其弟子者，基常謙抑不以師道自尊。所著有大學發揮，易學啓蒙發揮，中庸發揮，基文集三十卷等行世。見宋史卷四百三十八。

何時，字了翁，南宋，撫州樂安人。與文天祥同年舉進士，初爲廬陵尉，江西轉運司幕府，臨江軍司理參軍，知興國縣。及文天祥奉詔起兵勤王，任爲帥府機宜，効命於國家危難之間，隨文天祥出生入死，兵敗，文天祥成仁取義。時則逃遁空門，削髮爲僧，流落嶺南，賣卜以終餘年。見宋史卷四百五十四。

何氏，南宋，吳人，吳永年之妻也。高宗建炎四年，金兵進侵其家鄉三吳，官兵遁去，城中士民，被金兵殺死者五十餘萬。時吳永年與其姊及其妻奉母而逃，母老，待扶持而行，乃爲金兵所執，將縛其姊及何氏，有所圖也。何氏人急智生，給謂之曰，諸君何必懼吾輩婦人之不聽命也，金兵信之。行次水濱，乃謂夫曰，我不負君，立自投於河而死，其姊繼之亦死，史載烈女篇。見宋史卷四百六十。

何充，南宋，漢州德陽人。爲黎州通判，攝州事。時元軍來攻，充率軍民固守，不敵，充自殺不死，乃被擄，元將虛賓席待之曰，汝能降，即請坐。充踞地上求死，元將莫之奈何，他日，元將又呼之，使人辯其髮而髡其頂，充曰頭可殺不可髡。又元將屢遣人遺之酒茗牛羊肉，充皆卻之。元將知不可強，乃斬其首。先是有人勸其臨難圖苟免者，充正其色曰，

吾三世食趙祿，死不憾，汝等自求生可也。於是上下感泣，願同生死而不肯降元者四十餘人，從充之妻，子，孫，侄同就義。見宋史卷四百四十九。

元，公元一二八零年統一大業至公元一三六八年而亡於明，僅八十八載。元主爲蒙古族人，入主中夏，武功曾盛極一時，故疆域之廣，爲歷朝之冠。

何瑋，元，易州人。父何伯祥，孔武有力，少年從軍於金，後仕元，卒於戰陣。瑋襲父職，知易州，屢建戰功，及元有天下，任懷遠大將軍，擢中書參知政事。大德四年，授御史中丞，陳當世要務十條，元帝嘉納之，乃建立孔廟，復修國學。至大元年，遷太子詹事，拜中書左丞，卒於官，追贈太傅。見元史卷一百五十。

何實，字誠卿，元，北京人，父何道中，仕金，爲北京留守。實少孤，依叔父居，天生氣宇不凡，通諸國譯語，驍勇善騎射，倜儻不羈，遠近之民，慕其雄略，咸望風而歸之。當宋末元初之際，天下未定，盜賊多蠭起，實爲元將木華黎賞識，薦於元帝，被選充前鋒，佐木華黎征戰，以功爲元帥左監軍。實治軍甚嚴，多著善政。大德元年，元帝召見，賜坐，與論軍中故事，欲授以征行元帥大任。實叩謝曰，小臣被堅執銳，從事鋒鏑二十餘年，身創十餘槍，已廢人矣，臣不敢辱命，願辭監軍之職，優游以終。見元史卷一百五十。

何榮祖，字繼先，元，原籍太原人。父何瑛，仕金，任明威將軍。金亡，徙居廣平。榮祖有異相，魁梧奇偉。相者謂曰，子位極人臣且壽者相也。果爾，榮祖仕元，官至昭文館大學士，加平章政事。著有大德律令，大畜十集，學易記，載道集，觀物外篇等書，以廉潔終其身，追贈大司徒，趙國公。見元史卷一百六十八。

何太虛，名中，元，撫州人，少聰拔，篤志古學，家有萬卷藏書，乃朝夕校誦，精博宏深。時賢皆推崇備至。太虛獨無意仕途，以布衣講學而終其老。遺著有易類象二卷，書傳補遺

十卷，通鑑綱目測海三卷，知非堂稿十七卷。見元史卷一百九十九。

明，公元一三六八年至公元一六四四年。初建都南京，至永樂元年，即公元一四零三年，遷都北京，以迄崇禎，而亡於清。其後南明三王，相繼於敗軍中至公元一六六二年而絕滅。

何真，字邦佐，明，廣東東莞人。少英偉，通書劍，初仕於元，時當元末，政教敗壞，盜竊亂賊而作，真雖悉力以靖四境，奈中原鼎沸，嶺表隔絕，僅憑海道略通而已。故有勸真效趙佗故事者，開國於南天，不聽。時真爲廣東都元帥，行省左丞，直至元朝大勢已去，乃順時務之趨，不傷一民一兵，保境歸附朱明，遂奉詔入朝，任江西行省參知政事，遷山西右布政使，浙江布政使，湖廣布政使，封東莞伯，祿一千五百石，予世券。真居官有聲望，讀書綴文，富儒雅風度，以恩禮令終。見明史卷一百三十。

何文輝，字德明，明，安徽滁州人。生於元末亂世，年僅十四，明太祖攻下滁州時，收爲義子，賜姓朱名道舍。太祖初起，多撫義子，及長，命偕諸將分守諸路，每死於戰役。文輝其勇且幸者，所向無敵，以功至爲天寧翼元帥，守寧國，攻江西未下之州縣，討新淦，援安福，平山尖寨，復隨大將徐達下平江諸役，皆建奇功。太祖嘉之，復其姓名，進任行省左丞，征南副將軍。乃與平章胡美從江西進攻福建，旌旗所至，元軍無不披靡，元將達里麻夜至文輝營乞降，翌朝元總管翟也先又率衆降於文輝。胡美怒元將不歸於己，竟欲屠其城。文輝馳告胡美曰，與公同受命於此，爲安百姓耳，今敵已降，奈何以私人之忿而殺無辜之人，胡美乃止。師入城，秋毫無犯，各地州縣聞之，因相次歸附。文輝治軍，號令明肅，軍民皆德之，謀略威望，一時罕有及者。官拜大都督府同知，旋以守居庸關，卒於疾。子何環，任成都護衛指揮使。見明史卷一百三十四。

何福，明，安徽鳳陽人。洪武初，爲金吾後衛指揮同知，都督僉事，平蠻有功，拜征虜左將

軍。太祖崩，惠帝即位，奉詔練兵德州，進任左都督。及成祖即位，以何福宿將知兵，益善視之，封寧遠侯，寵任逾諸將。何福或不免自醉於三朝元老，未能謙以受益，以至微言漸滋，受劾，乃自縊而死。見明史卷一百四十四。

何喬新，字廷秀，明，江西廣昌人。父何文淵，永樂十六年進士，授御史，歷按山東四川，擢刑部右侍郎，吏部尚書，加太子太保。正統間，英宗北征，弟郕王監國，英宗未返，郕王藉故遙尊英宗爲太上皇帝，而自立爲景帝。文淵因是有直言而不容於朝廷，憤而自縊。時喬新已登景泰五年進士，喬新有乃父之風，性廉介剛直，歷官福建副使，巡撫山西，南京刑部尚書。嘗使淮西，有巢令閻徽者，曾授業於文淵，圖報師恩，以金幣餽喬新，喬新卻之，閻曰，以壽吾師耳。喬新曰，子欲壽吾親，因他人致之則可，因吾致之則不可，卒不受。喬新敬事之外，博覽羣籍，藏書三萬餘卷，以此而終其身。五世孫何源，居官亦廉明。見明史卷一百八十三。

何鑑，字世光，明，浙江新昌人。成化五年進士，授宜興知縣，河南知府，巡撫江南。時松江水災，以疏導諸渠，泄水入海，水患以除。又承平日久，治極則亂，正德年間，大盜四起，奉詔還朝爲刑部尚書，兵部尚書。鑑乃選將練兵，錄用民間武士，教導鄉衆樹柵浚溝，團結相救，守望相助，幾經剿伐，始平蕩羣賊，而安四境。復上書朝廷，謂民遭兵燹日久，請量減田租，多方賑贍，黜貪殘長吏，停不急工役，還民於故業，貸以牛種等。立功立言，有古社稷之臣風範。惜以勸諫，阻用迤北族降人充御馬監勇士，帝竟忠言逆耳，爲諸倅臣所左右。乃引退，卒年八十。見明史卷一百八十七。

何紹正，明，浙江淳安人，弘治十五年進士。正德年間，任海州判官，遷池州知府。時武宗無嗣儲，寧王朱宸濠遂起異心，乘帝南遊時造反，陷南康，九江，攻安慶，逼近池州，池

人震恐，紹正登城指揮固守，事平，紀功遷江西參政。池州之民，甚德之，於其歿後，因立祠廟，與宋包拯並祀。見明史卷一百八十八。

何遵，字孟循，明，江蘇江寧人。家貧，父命之賈，非所志也，乃苦學，正德九年舉進士，官至工部主事。時帝將南巡，遵步刑部主事黃鞏等忠貞之士極諫，帝怒，廷杖三十九人，因杖至死者十一人，遵亦創甚，肢體俱裂，越二日遂卒，年僅三十四，身後蕭條，僚友助而殮之。帝不聽忠言，果有寧王朱宸濠之亂。當遵草奏之時，家僮見而危之，乃抱遵而哭曰，主縱不自計，獨不念老親與幼子乎，意欲止之。遵執筆從容曰，爲我謝我老親，勿令我兒子廢學足矣。遵如知死期不遠。見明史卷一百八十九。

何孟春，字子元，明，湖南郴州人。祖何俊，雲南按察司僉事。父何說，刑部郎中。孟春少遊學於文淵閣大學士李東陽之門，學問淹博，弘治六年舉進士。官歷兵部主事，員外郎，右副都御史，兵部右侍郎，吏部右侍郎，左侍郎。正德初，曾請明正孔廟祀典，不納。及世宗即位，因追尊立廟不當，而大興杖諫之刑。孟春乃稱疾引退，得卒於家。見明史卷一百九十一。

何卿，明，四川成都人。少習武略，正德中棄，嗣世職爲指揮僉事，歷有戰功，進左參將，副總兵，署都督同知，先後鎮守四川西陲松潘一地凡二十四年，夾道築牆數百里，以禦外患，以安行役，爲軍民愛戴之若慈母，謳歌頌德。嘉靖三十三年，公元一五五四年，倭寇海上，爲日本人侵略中國之始。卿奉命總理浙江，江蘇，松江沿海防務，以抗倭患。卿本蜀中名將，奈不諳海道，兵將亦不習海戰，遂無功，乃引退而卒。見明史卷二百一十一。

何士晉，字武義，明，江蘇宜興人。父何其孝，得士晉晚，族子不軌，謀財殺其孝。士晉匿繼母外家得免，乃奮志讀書，萬曆二十六年舉進士，始雪父仇。士晉乃移孝於忠，畢生以

盡臣道，官歷右僉都御史，巡撫廣西，兵部侍郎，總督兩廣軍務，兼巡撫廣東。旋被誣受賄，罷官，憤鬱而卒。見明史卷二百三十五。

何如寵，字康侯，明，安徽桐城人。父何思鼇，知山東棲霞縣，有德於民。如寵登萬曆二十六年進士，官歷國子監祭酒，禮部右侍郎，左侍郎，禮部尙書，武英殿大學士。如寵性復孝友，母年九十，色養備至。兄何如申亦舉進士，官戶部郎中，督餉遼東，有清操，終於浙江布政使任內。見明史卷二百五十一。

何吾騶，明，廣東香山人，萬曆四十七年進士，由庶吉士歷官少詹士，崇禎五年，擢禮部右侍郎，翌年加尙書。時當明末，天下多事之秋，朝臣復起權勢之爭，互相攻訐。吾騶終以直言受累罷官而去。居久之，會唐王朱聿鍵自立於福州，召爲首輔，與鄭芝龍議事，輒相牴牾。及福建陷落，唐王遇害。吾騶踉蹌而回廣州，爲永明王以原職召之，惟不見容於同僚，乃託疾辭去，居家著述，所著有元氣堂詩文集三十卷，經筵日講拜稽錄四卷，雲笈軒稿二卷，石刻楷書四種，以終其年。公元一九五九年，在其故鄉小欖鎮鳳山出土，得何吾騶墓志銘全文，概述生平。見明史卷二百五十三及中山市小欖鎮明清兩代何氏科名錄。

何可綱，明，遼東人，即今之遼寧省。天啓中，以守備進任兵部尙書袁崇煥中軍，鎮守寧遠，曾大敗來犯清兵有功，遷參將，署寧遠副將事，深得崇煥倚重。崇煥爲有明一代名將，曾上書崇禎帝，謂可綱仁而有勇，廉而能勤，事至善謀，其才不在臣下，臣向所建樹，實可綱力，請加都督僉事。帝從之，旋進職右都督，力建戰功，加太子太保，左都督。及清兵十萬圍錦州，可綱督師赴救，堅守久之，糧盡援絕，總兵祖大壽與諸將願降，可綱獨不從，卒爲叛將所殺，可綱臨難顏色不變。錦州一失，京師屏嶂盡撤，明室從此多難，宗藩諸王星散。見明史卷二百七十一。

何剛，字慤人，明，江蘇上海人。崇禎三年，舉於鄉，見海內大亂，慨然有匡世之志，投筆從戎，曾上書朝廷，力陳戡亂之策，以治兵爲先。惜爲時已晚，崇禎十七年，京陷，帝自縊。福王朱由崧在南京稱帝，剛乃投隸兵部尙書史可法，可法大喜得剛之助，以守揚州。及揚州爲清將多爾袞圍攻，致書勸降，可法堅卻之，旋清兵大至，薄城下，礮擊城西北隅，城遂破，剛與可法同殉國難。見明史卷二百七十四。

何楷，字元子，明，福建漳州人。天啓五年進士，崇禎時授戶部主事，進員外郎，改刑部給事中，遷工科都給事中，以不阿權勢，直諫見稱。及京陷帝崩，福王建都南京召爲戶部右侍郎，督理錢法，嗣南京破，福王被執，文武百官降清，楷獨走杭州，從唐王朱聿鍵入福建，唐王稱帝福州，任戶部尙書。因劾總兵鄭芝龍專橫無禮，乃不爲所容，棄官歸漳州。及鄭芝龍獻仙霞嶺降清，以爲進身，時其子鄭成功尙守臺灣抗清，清人疑其詐而殺之。福州亦陷，漳州自不幸免，楷遂痛國破家亡而卒。見明史卷二百七十六。

何騰蛟，字雲從，明，貴州黎平人。天啓元年舉於鄉，官歷南陽知縣，兵部主事，淮徐兵備僉事，右僉都御史，以至崇禎帝崩，湖北之地盡失，福王召爲兵部右侍郎。會叛將良玉舉兵反，欲劫持騰蛟偕行，騰蛟不應，擬自刎，爲良玉部長擁去，駕舟而行，騰蛟乘間躍入水中逸去，漂流十餘里，得漁舟之助，乃脫險以抵長沙。及至福州，唐王知其賢，信任備至，騰蛟佐輔唐王，一時豪傑歸之，驟增兵馬十餘萬，聲威大振，拜東閣大學士，兼兵部尙書，封定興伯。當是時，騰蛟舉兵，銳意欲復明室大業，不成，爲清兵破汀州，唐王被殺，贛州亦失。旋永明王立於廣東肇慶，召騰蛟，爲武英殿大學士。時清兵節節南下，乃隨永明王走廣西，收復衡州，騰蛟乘勝趨長沙，終在湘潭殉難。見明史卷二百八十。

何塘，字粹夫，明，安徽武陟人。篤儒學，弘治十五年舉進士，選庶吉士，官修撰，山西提

學副使，浙江提學，敦本尚實，士氣丕變，與湛若水等修明古太學之法，學者翕然宗之。官歷工，戶，禮三部侍郎，南京右都御史。晚年居里講學，教人以孝弟忠信。所著有《陰陽律呂》，儒學管見。見明史卷二百八十二。

何廷仁，字性之，明，江西雩都人。性和易近人，誠意盎溢，初慕陳白沙，後遊於王陽明守仁之門，深得默坐澄心之法，致良知之學說。嘉靖元年舉於鄉，官廣東新會知縣，遷南京工部主事。廷仁爲官，政尚簡易，立論尚平實，故深受士民愛戴。王陽明之門，從遊者恒數百人，然陽明之學能實踐者，廷仁之外，餘不多人。見明史卷二百八十三。

何景明，字仲默，明，河南信陽人。八歲能詩古文，年方十五，舉弘治十一年鄉試。年方十九，舉弘治十五年進士。授中書舍人，進吏部員外郎，擢陝西提學副使。景明爲官，志操耿介，尚節義，薄榮利，有國士之風。其教諸生，專以經術世務，知名當世。景明所爲詩文，不事摹倣，主創造，獨樹一幟。其詩備載於明詩選最，與慶陽李夢陽，吳縣徐禎卿，歷城邊廷實，並稱四傑，卓然爲有明一代大家。見明史卷二百八十六。

何良俊，字元朗，明，江蘇華亭人。少篤學，嘗二十年不下樓，以貢生入國學，授南京翰林院孔目。與弟良傅，並負俊才。良傅舉進士，官南京禮部郎中。良俊於仕途，久不得志，乃慨然歎曰，吾家清森閣在海上，藏書四萬卷，名畫百籤，古法帖彝鼎數十種，棄此不居，而僕僕作牛馬走乎，乃棄官而歸，不屑三斗之米，若彭澤然。見明史卷二百八十七。

何天衢，字升宇，明，雲南阿迷人。有勇略，生逢明末多難之秋，文武不能惟其所用之世，乃被土酋普名聲招爲頭目，使駐守三鄉。崇禎三年，普名聲反，出兵三路，至昆明會戰，命天衢領礮手三百人自維摩羅平入。天衢乃慨然曰。此大丈夫報國之良機也，吾豈爲逆賊用哉，遂坑殺頑強者數十人，率衆投誠，普名聲聞之大懼，急撤兵而退。巡撫王伉上奏其

事，授天衢爲維摩州守備。及普名聲死，其妻萬氏，代領賊衆，屢攻天衢，天衢俱挫之，錄功，進參將，擢副總兵。其後萬氏會安南兵，及厚賄權臣門下，使坐視不救天衢，天衢乃敗，舉家自焚，爲國盡忠。見明史卷二百九十一。

何廷魁，字汝謙，明，山西威遠衛人。萬曆二十九年進士，授涇縣知縣，遷刑部主事，歷歸德，衛輝，河南知府，巡撫遼陽。時清兵攻陷瀋陽，遼陽告急，危在旦夕，同事多備逃遁，獨廷魁願與遼陽共存亡，廷魁謀待清兵渡濱之際，盡出精銳以擊之，奈將士不効命，城破，舉家投井死。見明史卷二百九十一。

何燮，字中理，明，福建晉江人。舉於鄉，官知亳州，崇禎八年，歲值饑饉，寇賊交橫，老弱溝壑，壯者散之四方。惟燮能盡心盡力，扶危備戰，曾戰於盧家廟，生擒來自山東河南賊魁二人，撫降數千人。及李自成陷河南，士民望風逃竄，城陷，燮不屈，賊剖其胸，懸其首於市上，面目如生。見明史卷二百九十三。

何復，字見元，明，山東平度人。崇禎七年舉進士，官歷高縣知縣，工部主事，員外郎，保定知府。時李賊自成陷山西，復與邵宗元同守真定，率諸生謁文廟，講見危受命章，於是士氣激昂，登城堅守，奈賊攻益厲，城破，殉於國難。見明史卷二百九十五。

何承光，明，貴州鎮遠人。萬曆四十年舉於鄉。崇禎中，官歷夔州同知，時有賊自荊州入犯夔門，副使周士登在涪州，城中倉猝無備，通判，推官，知縣，悉遁去，承光在危難中攝理府事，率吏民固守，力竭城陷，承光整冠帶端坐，臨危不亂，臨難不圖苟免。賊入竟殺之，投其屍於江上。見明史卷二百九十二。

何麟，明，山西沁水人，爲布政司吏。正德間，武宗微服出行，由大同抵太原，城門閉，不得入，怒而還京，遣中官逮捕守臣不啓門者，於是巡撫以下皆大懼。麟挺身願一人當之，

乃隨中官抵京，不顧天威之難測。上奏曰，陛下巡幸晉陽，司城門者，實臣一人，他官無預也，臣不能啓門迎駕，罪當萬死，但陛下輕宗廟社稷，易服微行，無清道警蹕之詔，臣下何由辨焉。昔漢光武夜獵，至上東門，守臣郅惲拒之弗納，光武嘉其守法。帝覽後，怒稍息，廷杖六十釋還。衆感其義，郊迎之。見明史卷二百九十七。

何鰲，字子魚，明，廣東順德黃連人。世仕宦，鰲弱冠能文，舉弘治甲子鄉試，正德戊寅第進士。初知浙江慶元縣，民獷悍，地方豪猾，鰲至，立誅首惡，與民更始。擢監察御史，官歷巡按湖廣，守松江，浙江副使，徐淮兵備道，福建左參政，湖廣左布政道。正德間，公元一五零六年至一五二一年，番舶佛郎機常藉往來貿易，橫行江浙閩粵諸省沿海。佛郎機者，汎指西班牙，葡萄牙，荷蘭等洋人船舶。中國向疏於海道防衛，至是開洋人入侵之始，若海盜然，且日益其厲，曾一度突入廣東會城。鰲有遠見，奏請驅逐番舶，禁私通，誅內奸，嚴守備，洋寇之凶，由是暫戢一時。乃至嘉靖間，公元一五五七年，海禁復弛，香山之澳，遂淪爲葡人竊據。兄宏字道允，正德丁卯舉人，通州學，居官清正見稱當世。弟鰲字子時，嘉靖己丑進士，授兵部武庫主事，督教武學。旋不得志，遂移疾以歸，杜門謝客，益邃於學，著有禮經劄義傳世。嘗立祖祠，睦宗族，出穀以恤其鄰里，與士言，時以名節爲勗，卒年六十六，與兄鰲同祀鄉賢祠。見明史卷三百二十五及順德縣志咸豐版。

何維柏，字喬仲，明，廣東南海人。嘉靖十四年進士，選庶吉士，授御史，巡撫福建。因劾大學士嚴嵩奸貪枉法，幾招殺身之禍，被詔逮之日，士民遮途號哭之。維柏意氣自如，受廷杖罷官，家居二十餘年，在廣州河南建天山草堂，聚徒授課。所著有易學義禮經辨，太極圖解，天山存稿等傳世。及隆慶改元，穆宗即位，召復官，擢大理寺少卿，進左副都御史。旋丁母憂以歸，至萬曆初還朝，歷吏部右侍郎，南京禮部尚書。見羊城古鈔人物錄。

何絳，字不偕，明，廣東順德羊額人，生於明天啓七年，公元一六二七年，終於清康熙五十一年，公元一七一二年。當明季末年，清兵席捲中原，廣東亦告不守，抗清起義之嶺南三忠，先後殉難。不偕乃與兄何衡，及陳元孝，陶璜，梁棟，遜迹鄉中，讀書寫作，號北田五子，實暗裏揣摩韜鈐書，戢翼以待義舉，及聞永明王仍在雲南，乃與陳元孝赴澳門；復同渡銅鼓洋訪逃避諸遺臣於海外，作為聯絡，然後間關北上，經湖南湖北，以抵蕪湖，待會鄭成功海師復明之戰。迨事敗，不偕仍秘密往來徐豫吳越齊魯等地之間，以俟機會，及周覽大勢，始悵然回粵，義不仕清。乃日與高人雅士，暢遊於西樵羅浮山中，相與吟詠，以消其悲憤慷慨之意，宣其浩然之氣。故其一贈一答，與陳元孝，梁藥亭，諸僧侶爲多。晚年居鄉，與語今古典故，終日不倦，談及忠孝事，常義形於色。性復英爽，以賢智信服於其家其族。嘗有閩客寄存以三百金，二十年後，客死已久，忽一日，客之子至，詢所寄存之金，不偕與往古井旁，指曰金在井次埋土中，命取出，封識宛然。後人因稱此爲還金井，歷久未廢，成爲地方永遠掌故。遺著有皇明紀略，不去廬集。配室陳，再配周，俱先不偕卒，清乾隆十二年，公元一七四七年，合葬於同邑容奇小沙浮岡，墓下爲清初古止和尚創建雨花寺，相去不遠。寺前原有何不偕先生墓道通往，墓有志銘，爲新會胡金竹所譏，志末銘曰，西山夷齊，東海魯連，私謚靖節，同人翕然，斯碣不磨，生氣千年。碣有篆額，爲同邑蘇珥所書曰，有明高士何不偕先生墓。一九七三年香港至樂樓何耀光先生重印不去廬集流傳，見該集附粵東遺民錄及錦巖何蒙夫跋。又見廣東文徵第四冊原卷十八。何子海，字伯川，明，廣東番禺人。世代簪纓，乃始居番禺沙灣四世祖，南宋淳祐十年進士何人鑑之遠孫。子海舉洪武四年進士，授文林郎。官歷睢寧縣，永康縣縣丞，有政聲，博學能詩，著有秋風三疊，百川集。見廣東文徵第二冊原卷六。

何熊祥，字乾宰，明，廣東新會人。萬曆壬辰進士，選庶吉士，授御史，官歷巡撫上谷，福建，三吳及南都七郡，秩滿，任太僕寺大理寺卿，遷南刑部侍郎。時神宗倦勤，至兩部員空缺，多不補任，故熊祥在南刑部嘗兼署吏戶禮三部尙書。著有四巡疏鈔六卷，馬政事宜平刑八義共十卷，南部疏略三卷。晚年以親老告歸，息影園林，卒謚文懿，時人以其能在崇禎末年而終，未覩亡國之痛，稱爲福人。見廣東文徵第四冊原卷十六及羊城古鈔坊表。

何彥，字善充，明，廣東順德馬寧人。父何千之，約己利人，倡浚河修路，鄉間德之。彥英偉，舉嘉靖乙未進士。官歷南京戶科給事中，出守衡荆，任太僕寺卿，居諫垣，嘗劾吏部尚書許讚徇私枉法，及劾禮部尚書嚴嵩宣淫納賄，不懼權勢。年老退居里中，恂恂於人無忤，築樓曰定性曰澄心，靜坐其間，時講學賦詩，著有石川集，當道重之，年九十九卒，祀鄉賢祠，子兆湖，舉萬曆乙卯鄉薦，歷國子監學生。見廣東文徵第三冊原卷十二。

何道瀾，字濬伯，明，廣東順德羊額人，嘉靖壬辰舉鄉薦，壬戌授郾城教諭，以興德育才爲己任。歷主江西鄉試，署河南長葛知縣，復知湖南安化縣，寬和牧民，誅亂正教，積勞成疾告歸，卒年八十。弟道臨字建伯，嘉靖乙卯舉人，授高安教諭，任浙江鄉試分考，知廣西崇善縣，擢守四川涪州，進左參議。剛介勤政，立學社，禁嚚訟，絕包收，清盜源，大綱畢治，終以忤當道，引病乞休，卒年六十三。見順德縣志咸豐癸丑版。

何載寵，字子玉，明，廣東順德三桂人。與弟載陽，並稱純孝。載寵領萬曆乙卯鄉薦，知浙江富陽縣，多善政，卒於任。官民爲罷市巷哭三日，祀富陽名宦祠。弟載陽字子元，年十五補庠生試，高第鄉試兩舉乙榜。事親能先意承志，與兄出必隨行，善與人交，以篤課子弟終其身。見順德縣志咸豐癸丑版。

何淡，字仲美，明，廣東順德葛岸人。正統丁卯舉人，天順丁丑進士，官歷山東省濱州牧，

工部虞衡員外郎，漢陽太守，貴州左參政，所致有聲。嘗以所入，移應公務，爲興學舍，修禮器，聘儒師之用，使科第煥赫，甲於他州。教民力農，爲築陂堰，節浮費，以裕民生。居貴州時，苗人相攻，郡縣騷然，方議用兵剿之，淡單騎深入，諭以威德，其事遂平。淡居官三十年，廉明仁恕，政務畢張，民安其業，旋以年老乞歸。晚年以授課種園蔬自給自樂，卒年七十五，入祀鄉賢祠。見順德縣志咸豐癸丑版。

何經，字宗易，明，廣東順德葛岸人，何淡之從弟。景泰甲戌進士，成化初，任工部郎中。時荆襄盜起，經隨尚書白昂征之，親冒矢石，平亂有功，擢貴州左參政，復陞雲南布政。兩廣大軍征荔浦諸蠻時，經獨當一面，且攻且守，諸峒悉平，遷右副都御史以至告歸，生平喜賦詩自遣，著有平南集，南遷稿，京行百詠，兩廣觀風集。見順德縣志咸豐癸丑版。

何瑗，字汝璧，明，廣東順德桂圃人。正德甲戌進士，官歷山東省參議，分守海右道，以勸民墾荒種樹，招撫流亡爲務。復調任廣西，綏靖猺獞，以禮教諭蠻族，建靖州學社育士，計擒貴縣奸豪，朝廷嘉之，以倦休。見順德縣志咸豐癸丑版。

何珖，明，廣東順德桂圃人。與同族何瑗，正德甲戌進士。何瑜，成化乙未明通榜。何汴，弘治辛酉舉人。何與倫，萬曆己卯舉人。何太庚，萬曆丙戌進士。何瑜，弘治歲薦。當明季中葉，科名稱盛，宦績並著西粵，各有政聲。珖成化乙未進士，官歷御史參政，出知梧州，處事剖決如流，悉中理法，與同里何沾何允魁同稱何三直。見順德縣志咸豐癸丑版。

何沾，字宗澤，明，廣東順德桂圃人。與兄何淳字宗厚，同登弘治壬戌進士。淳歷任贛縣，臨川知縣，南京戶部主事。沾受行人，嘗出使安南，能振上國威儀，還朝，擢南京御史，監鄉試，防範有法，常以清白自勵，不增田產，或問以何遺子孫，曰清白足矣。竟以忤權貴，被謫福州，未到任而卒。見順德縣志咸豐癸丑版。

何斌，又名何廷斌，明，福建泉州安南人。是海上冒險家，早年即泛海謀生，先曾到日本經商，後到臺灣發展貿易，前後達三十餘年。時當明季末葉，荷蘭人於天啓四年，公元一六二四年及崇禎十五年，公元一六四二年，竊據臺灣南部及北部。斌生逢亂世，苟存之計，乃以幹事練達，善言辯，長交際，復習番語，得受荷蘭官商信任，以至在東印度公司任通事，爲漢人長老。及聞同鄉鄭成功有攻取臺灣作抗清復明基地大計，斌以大義所在，乃設法探測水陸形勢，製成地圖，密獻鄭成功。成功憑此，果於南明永曆十五年，清順治十八年，公元一六六一年，從荷蘭人手中，光復臺灣。後人詩讚之曰『獻圖成決策，領港率艨艟，臺海昇平日，驅荷第一功』。見新亞出版社臺灣名人傳。

何克諫，別署青蘿道人，明，廣東番禺人，明沒，效采薇西山，隱於醫，著生草藥性備要。食物本草。閒與志士仁人往來，陳元孝贈其壽詩云『洞口桃花落雨餘，清溪流出引樵漁。姓名不愧何徵士，甲子終虛宋永初。七字題詩傳白社，千峯采藥散比闔，知君妙得還童訣，元鬢朝來漸滿梳。』見陳荆鴻箋釋獨漉堂詩箋江村集。

何運亮，字紫屏，明，福建泉州人，崇禎癸未進士，官歷憲副。明亡，即薄儒冠，禮天然和尚於番禺雷峯之麓海雲寺爲師。法號今宣居士，放蕩方外，以尙氣節。閒與山中同道，吟咏遺懷，雷峯孟蘭日作詩一首云，『波浪頻驚此地安，况逢山寺暫同歡，孟添香供擎仙露，月引潮光上石闌，東望海門憑薦渺，南來秋色幾凋殘，夜深人定鐘聲後，橋畔涼侵落葉寒。』尤爲世所傳誦。見海雲禪藻集卷四。

何氏，明，湖南臨武諸生鄺抱義妻。崇禎末，天下大亂，何氏爲賊所執，乃垢面蓬髮給以病疫，賊懼釋之。及賊退，家人咸喜，何氏泣曰，平昔謁拜叔伯，猶赭顏汗發。今匿身不固。以面目對賊，牽臂引裾，雖免污辱，何以爲人。竟不食而死。見明史卷三百零三。

清，自順治元年，公元一六四四年，明崇禎十七年三月，京畿陷，崇禎帝自縊死於萬歲山，明亡。至康熙元年，公元一六六二年，鄭成功圖復明室之兵敗，永明王朱由榔走雲南而入緬甸，緬甸王執其父子送雲南清兵，被殺，南明亡。滿人遂統一中國，至宣統三年，公元一九一年遜位。結束愛新覺羅王朝。

何國宗，字翰如，清，順天大興人，順天爲清代國都，即今之北京，屬河北省。國宗舉康熙五十一年進士，授編修，侍讀學士，直內廷學算法，編輯律曆淵源。乾隆間，充算學館，律呂館總裁，兼領欽天監正，晉工部侍郎。任內奉詔視察黃河，運河河道水利，奏請疏濬修築工程。復奉詔製皇輿全覽圖，周行至混同江鴨綠江，達朝鮮分界處，及新疆境域，測繪爲圖，能曲折詳盡，受朝廷嘉許。弟國棟，亦以通曆法直內廷，曾歷江南諸省，測北極高度及日景，鐫以銅版，藏之內府。見清史稿卷二百八十三。

何師儉，字桐叔，清，浙江山陰人，康熙十六年選授兵部員外郎，奉職勤懇，常數月不出其署。雍正元年，遷廣西右江道僉事，旋任江南鹽驛道副使，廣東糧驛道副使，陝西佐治軍需，西安鹽驛道副使，俱能諳悉機宜，芻餉緩急。及擢按察使，數平疑獄，以廉明稱，晚年目疾請退，卒於家。見清史稿卷三百。

何煟，字謙之，清，浙江山陰人。原籍湖南靖州。雍正中，授州同知，効力修江南河，浙江尖山海塘，有功，擢河庫道，遷兩淮鹽運使，兼管河務。以治淮揚河務，超擢淮揚道，乾隆二十六年，內調郎中，擢按察使，布政使，授巡撫，俱兼理河務，得愛民知政之褒。乾隆三十八年，帝巡天津，閱永定河工事，煟迎駕，獲賜孔雀翎，黃馬褂。後加總督銜，兵部尙書銜，病，卒，追贈太子太保。子裕成，字福天，爲貢生，官歷山東督糧道，陝西巡撫，江西巡撫，任內於治河修築隄岸，能繼述其父。著有全河指要，謂治河之要，當宣節

並重，後世則之。見清史稿卷三百二十五。

何元卿，清，四川華陽人，從征伐金川，廓爾喀，苗疆，積勞擢副將，復克旗鼓寨，有功擢陝西興漢鎮總兵。以參達州橫山子之戰，死於軍旅。見清史稿卷三百四十九。

何凌漢，字仙槎，清，湖南道州人，嘉慶十年，廷試探花，授編修。道光間，官歷順天府尹，大理寺卿，左副都御史，工部侍郎，左都御史，工部尚書，吏部尚書，歷主廣東，福建，浙江，順天鄉試。子紹基，嘗主試福建，父子同持文柄，爲人物之權衡，時人榮之。凌漢卒，贈太子太保。見清史稿卷三百七十四。

何汝霖，字雨人，清，江蘇江寧人。道光五年舉人，官歷內閣侍讀學士，大理寺少卿，軍機大臣上行走，副都御史。旋授兵部侍郎，戶部侍郎，以協勘東河工程有功，擢兵部尚書，禮部尚書。年逾七十，卒於家，祀鄉賢祠。見清史稿卷三百七十五。

何桂珍，字丹畦，清，雲南師宗人。道光十八年進士，選庶吉士，授編修，督貴州學政，入直上書房，授孚敬郡王子讀書。咸豐末即位，曾受知潛邸，及即位，桂珍以所譏大學衍義芻言奏進，獲優詔嘉納。復數上疏，論時政得失。咸豐四年，授安徽徽寧池太廣道，時遊民捻軍倡亂，桂珍勝而撫之，不幸爲捻軍降將李兆受復叛所害，左右四十餘人皆從死。及事平，曾國藩奏言，謂桂珍曾率鄉團平亂，饑餓艱難，歷人間未有之苦，機事不密，爲叛人所戕，天下哀之。得詔世襲，建祠英山縣。見清史稿卷四百。

何如璋，字子峩，清，廣東大埔人，同治七年進士，授編修，以侍讀出使日本，及歸，授少詹事督船政，以佐李鴻章對外議和不慎，曾遣戍，後卒於家。見清史稿卷四百四十四。

何金壽，字鐵生，清，湖北江夏人，同治元年廷試榜眼，授編修，出督河南學政，兼日講起居注官。光緒二年，山西大饑，又二年京畿近郊大旱，金壽先後上奏，請行平糶策，及瀝

陳時弊，聲震一時，終以忤權臣之意，被謫，出知江蘇揚州府，有政績，錄築防隄功。病卒，貧至無以歸葬。見清史稿卷四百四十五。

何秀林，清，雲南宜良人，少從軍，以守備邊陲，累功任副將，擢雲南普洱鎮總兵。光緒十年，公元一八八四年，法人在北越侵略中國，歷史爲中法之役。秀林奉命，帥三千六百人出關，進駐興化應戰，攻大寺，大寨，秀林以地雷陷敵，法軍以數萬來援，戰爭激烈，互相傷亡慘重，秀林仍從容收集殘軍，退守同安，以圖再舉。及和議成，英雄無用武之地，數年乃卒。見清史稿卷四百五十六。

何曰愈，字雲陔，清，廣東香山人，香山今之中山縣也。父何文明，曾任河南洧川知縣，有惠政。曰愈少隨父宦游，讀書勵志，有幹材。道光間，授四川會理州吏目，土司某，桀鷙之部屬夷人，殺無辜漢民，知府乃命曰愈往查，土司以賄求免，曰愈正義而卻之，土司復以力挾之，亦不爲動，卒成查而還，由是知名，升岳池知縣。任內練鄉團，繕城郭，庀器械，以禦邊匪，民以安養生息。咸豐六年，寧遠府野夷，時出沒焚掠，川西保夷，亦頻肆擾漢民。時曰愈任參建昌鎮軍事，馳至平其事，以德服夷人，漢夷遂相安。曰愈因益悉夷番情僞，山川之險隘，擬有綏邊十二策，惜格不得上達。乃退居灌縣，後歸里息影林泉，卒於家，見清史稿卷四百七十九。

何璟，字小宋，清，廣東香山人，何曰愈之子。舉道光二十七年進士，選庶吉士，授編修。咸豐七年，公元一八五七年。英人攻略廣州，翌年英艦進侵天津塘沽，璟先後上陳戰守要略，指列謬誤，抗論外務，及參與平捻有功。官歷湖北布政使，福建巡撫，閩浙總督。光緒十年，法艦攻福州馬江，協辦閩防軍務張佩綸不聽從璟言，以至舟師大敗，京畿震動，璟負疚被劾褫職。見清史稿卷四百五十八。

何治運，清，福建閩縣人。嘉慶十二年舉人，博文強識，篤志漢學，與同邑陳壽祺，謝震，爲清中葉一代經學大家。阮元督粵，授聘編纂廣東通志。後遊浙江，得巡撫陳若霖爲刻印其所編著之經解及論辨文字四卷，名何氏學。見清史稿卷四百八十二。

何焯，字屺瞻，清，江蘇長洲人。通經史百家之學，藏書數萬卷，得宋元舊本，必手加讐校，粲然盈帙。學者稱義門先生，傳錄其說，爲義門讀書記。康熙十一年，直隸巡撫李光地以草澤遺才推薦，召入南書房，賜舉人，復賜進士，授皇八子讀書，兼武英殿編修。深受康熙帝信任賞識。及解官，設講學。焯復工於楷法，手所校書，人爭寶傳，門人著錄者四百餘人，有聲於時。卒，帝聞，深悼之，追贈侍講學士。見清史稿卷四百八十四。

何秋濤，字願船，清，江西光澤人。道光二十四年進士，授刑部主事。關心經世之務，以俄國與中國壤地連接，宜有專書以資考據，乃始著有北徼彙編六卷，後復詳訂圖解，起自漢晉以訖道光，增爲八十卷。咸豐帝垂覽之。賜名曰朔方備乘。並召見，擢員外郎，懋勤殿行走。任內又著有王會編箋釋，一鐙精舍甲部稿，律例根源等。見清史稿卷四百八十五。

何紹基，字子貞，清，湖南道州人，乃嘉慶探花吏部尚書何凌漢子。紹基舉道光十六年進士，選庶吉士，授編修。以能承家學，少有名，阮元，程恩澤皆器重之。歷主福建，貴州，及廣東鄉試，均稱得人。咸豐二年，簡四川學政，旋主山東灤源，長沙城南書院，教授生徒，勗以實學。紹基復博通經史，精律算，嘗據大戴考證禮經，貫通制度，頗見精切。又爲水經注刊誤，於說文考訂尤深。所爲詩，類黃庭堅。嗜金石，精書法，初學顏真卿，遍臨漢魏各碑至百十過，運肘歛指，心摹手追，遂自成一家。著有東洲詩文集四十卷，卒年七十五。弟紹京，亦工於書。見清史稿卷四百八十六。

何道深，字會源，清，山西靈石人。由武進士，乾清門侍衛，出仕貴州提標游擊。乾隆三十

二年，兵部尙書明瑞總督雲貴，奉詔進討緬甸，集諸道兵馬，道深所統營卒，以整練冠他軍，乃爲明瑞重用。道深常冒矢石，攀柵先登，終以力戰陣亡，爲國盡忠。道深平素視將士如同手足，故皆悲涕。見清史稿卷四百八十九。

何霖，字雨人，清，廣西興安人。少讀詩書，抗志高尙，而不屑屑治章句。性復沈毅，有膽略。咸豐初，盜賊披猖，陷興安縣城，囚官吏，目無法紀。霖聞變，冒險詣省求援，并以智破諸賊，遂復興安。翌年，賊再犯興安，霖麾衆迎擊，力戰而死，廬舍被焚，家人盡被殺害，霖父挈孫走，得幸免於難。及事平，興安之民，多思念其功，乃建祠祀之。見清史稿卷四百九十三。

何培清，字鏡亭，清，廣東惠陽人。入提標，補千總。光緒三十四年，領連和防營，復守博羅，時天下動亂，培清力殲匪幫。及民軍攻博羅，培清率衆力守，民軍終得內應破關，執培清，不欲殺之，猝爲匪幫餘黨狙擊而死。見清史稿卷四百九十六。

何復漢，清，江西廣昌人。年十五而孤，事母至孝，母疾病，嘗親侍湯藥，卧不解帶者常數月，及母卒，寢苦三月，葬，乃廬墓之側，親友極勸，始哭而行。著有古今粹言，以示子孫。子何人龍，康熙五十二年進士，授編修。見清史稿卷四百九十七。

何夢瑤，字報之，清，廣東南海人。時侍讀惠士奇督學廣東，大明經術。夢瑤與其同里勞孝輿，吳世忠，順德羅天尺，蘇珥，陳世和，陳海六，番禺吳秋，一時並起，有惠門八子之譽。雍正八年，夢瑤舉進士，出宰廣西，以治獄嚴明，擢奉天遼陽知州，卒於任，所遺著書數萬言。見廣東文徵第五冊原卷十九。

何若瑤，字石卿，清，廣東番禺人。道光辛丑進士，授編修，擢右贊善大夫，以倦勤，乃告歸。主講禺山書院，總纂邑志，書未竟，遽卒。遺著有公羊注疏質疑二卷，海陀華館文集

一卷，詩集一卷，統名何宮贊遺書。見廣東文徵第五册原卷二十三。

何震，字雨望，號小山，清，廣東新會人。爲貢生，明吏部戶部禮部三部尙書何熊祥遠孫。震與其兄大山野望，爲當時騷壇俊侶，性慷慨，常傾資結客無所吝惜。順德何不偕嘗與詩一首云，白髮吾衰老，青年汝弟兄，少孤能自立，早歲負才名。見不去廬集仙湖客舍同野望雨望兩姪。可概見震之交游，得長輩之器重。見廣東文徵第五册原卷十九。

何友濟，字和衷，清，廣東香山小欖人。咸豐庚申進士，曾任吉林省理刑使，清理積檔，甚有政聲，回京後即任員外郎，旋任貴州司主事，方有大用於世，乃突病逝京師。遺著有草廬說經四卷，讀書管見十卷，鑑史類鈔二十卷，敦厚堂文集八卷。子何士珍，同治甲戌進士，官戶部員外郎。見香山小欖何氏明清科名錄。

何一柱，字孟行，清，廣東順德羊額人。父何鯤恩，爲貢生，著述甚豐。一柱幼承庭訓，康熙乙酉舉於鄉，授樂會教諭。樂會地處廣東極南，瓊州之東，文物浮薄。一柱乃建義學，嚴教化，自此士風丕振，化行俗美。著有四書講義，宣堂集，石澗旅遊瓊南諸草傳世。見順德縣志咸豐癸丑版列傳。

何士達，字悅公，清，廣東順德羊額人。康熙己丑進士，任廉州府教授，其地有陋俗，每歲暮，教官索取餘脩。諸生常袖金以上，士達義不肯受，獨勉諸生向學，論文校藝，博以羣書，貧者無力秋試，更資之道費，世稱明恬先生。見順德縣志咸豐癸丑版列傳。

何毅夫，名懋士，又字介園，清，廣東順德三桂人。乾隆乙丑進士，歷任省闈分校。知廣西昭平縣時，其地猺獞雜處，毅夫善爲招撫，以聚以教，與多士講論，常至深夜，士民德之。以歲災，被劾，乃引退。著有浣花堂集。見順德縣志咸豐癸丑版列傳。

何文宰，字勤良，清，廣東順德羊額人。文章憎命，屢試不第。其詩因窮而愈工，故與一時

名士，黎二樵，黃丹書，張錦芳常往還，交甚篤。妻陳廣遜，亦閨秀之傑出，作女子師，唱隨樂甚。文宰以布衣終。著有葭洲草傳世。見順德縣志咸豐癸丑版列傳。

何大勳，字庭結，清，廣東順德星槎人。職監生，持正有膽略，家僅小康，惟樂善不倦，倡建星槎書院，作育人才。鄉隅海濱，捍衛有方，使海上大盜張保，過不敢入。鋤莠植良，救災恤難，與同族健年，在璣，鄉人蘇爲儀協力爲之。見順德縣志咸豐癸丑版列傳。

何深，字海門，清，廣東順德人。爲黎二樵入室弟子，按同邑蘇文擢教授著黎簡先生年譜，謂縣志誤深作琛，俱不載其鄉籍。有清一代，黎簡二樵具詩書畫三絕，高名四達，海內重之，惟願執贊者不輕許及門，獨於深得晨夕過從，時親提命。深亦篤於學，乃盡得二樵伸絹滌筆之奧，每摹仿其師之作，輒可亂真。又得旁及人物，嘗貌其師於卷首，神態奕奕如生，並爲其師五百四峰堂詩鈔寫跋，因自號小樵山人。見黎簡先生年譜。

何淡如，本名又雄，清，廣東南海人。同治元年舉人，授高要縣敎諭。其後設帳羊城課徒，從游者衆。閒涉繪事，饒風雅，有急智，每語出驚人，吟詠多諧謔之作，有鬼才之稱，自號第尾才子。見嶺南畫徵略。

何大璋，字達卿，清，廣東順德大良人。乃明季江西鄉試主考何道瀾之十九傳孫，先世由羊額遷縣治。大璋天性純厚，少讀書，即期實用，膺道光甲午鄉薦，歷知山東省山左，汶上，鄒平，城武諸縣，勤慎廉明，案無留牘。咸豐乙卯隨太常寺卿龍元僖回里，服務桑梓，協辦廣東團練，創設青雲文社，悉心籌畫，壽八十三。見順德縣志民國己巳版列傳。

何灼猷，字子獻，清，廣東順德容奇人。弱冠博通經史，尤好公羊學，命偏舛，屢試不等。以同知聽鼓粵西，上書陳邊事，得官保蘇元春，撫軍張鳴岐器重，薦任廣西糧捕廳，歷官百色縣同知，兼護右江鎮篆，凡地方利敝，民生疾苦，禁煙治盜，一切興革要政，莫不次

第推行，及倡立廣西全省學務處，重修西隆學宮，膠序畢張，絃歌並作。復洞悉盤冤，常平反疑獄。去官之日，百姓攀轅泣別，歸里後，親老家貧，絕口不言阿堵物。晚年以課子弟讀書爲樂，至辛亥九月卒於故園，以清白傳其家。見順德縣志民國己巳版列傳。

何祖珏，字雙玉，清，廣東順德赤花人。道光壬午舉人，倡建證善社，以文會友。初受捏控被禁，旋獲查悉銷案。祖珏實有鑑於亂後人鮮知禮，乃設社專講太泉鄉禮法，以正人倫，以培人心，環聽者常百數十人，時人稱爲金玉君子。見順德縣志民國己巳版列傳。

何開泰，字葉文，號東墅，清，廣東順德羊額人。康熙己卯舉人，性機警敏捷，有謀略，知四川汶邑時，值對西藏用兵，羽檄交馳，凡崇巒層巘，務須削險爲夷，以廣馳道，開泰乃將查耳閣，五風，激羊店，三店，七盤，青沙坪諸處，自忘其勞，合民工之力，闢成康莊。其後復修皂角頭與皂灣二路，使樵牧負乘者，便於行旅，川民因甚德之。立皂角修路碑，並命名爲何公道，以紀其功。任滿後，歷遷順天府通判，吏部驗封司員外郎，以足疾告歸，卒於家。見五山志林及廣州府志。

何太青，字樂俞，清，廣東順德羊額人。嘉慶己巳進士，選庶吉士，歷知浙江於潛，德清，仁和諸縣，居官廉介，晚年南歸，講學州縣，嘗捐沙田四十畝與鳳山書院，充實辦學經費。平生尚風雅，著有潛川集，余不集，錢江集，將母集等。見廣州府志。

何惠羣，字和先，又字介峰，清，廣東順德羊額人，嘉慶己巳，與族叔何太青同科進士。授浙江新昌知縣，旋倦於仕途，值生母喪回里服孝，再不涉足公門。遂長期講學廣州，課徒之餘，常吟詠以自娛，惟不傍前人門徑，不主陽春白雪故步。獨事粵謳俚辭，抒發民隱，其中能流傳最廣，深入民間之作品，是南音說唱之歎五更，使後學者不少師其形式，大開粵謳，木魚，龍舟，南音風氣，傳至家喻戶曉。見廣州府志。

何祿，又名何六，清，廣東順德潭村人。少習武藝，魁梧豪邁，生逢清代晚葉，內則政教日非，民生凋敝，外則列強虎視，抗拒無方，乃激民於變，以傾覆清廷之腐敗統治。何祿因於咸豐四年當洪秀全建太平天國定都金陵之際，發難東莞，進佔石龍，復與佛山陳開，番禺陳顯良，廣州北郊李雲茂等聯合，聚衆十萬，祿居首領，進攻廣州，直逼河南。終以組織未備，敗退後，被清兵所執殉難。見旅美三邑總會館簡史及順德縣修志簡報第五期。

何國澧，字定怡，號愷蘭，清，廣東順德水藤人。光緒戊子舉人，乙未成進士，戊戌翰林院編修，歷任癸卯鄉試及甲辰會試磨礪，爲文章之司命，以功賞二品頂戴。兄何國澄，字定韶，號清伯，光緒己丑舉人，庚寅成進士，歷官內閣中書，授奉政大夫，贈通議大夫。弟國溥，字定瑤，邑庠生，花萼齊輝。見香港順德何厚本堂宗親會世德錄。

何藻翔，字翹高，又字梅夏，清，廣東順德東馬寧人。父何厚農，光緒丙子武進士，歷官營用守備，藻翔幼聰悟，九歲能背誦離騷，十四歲能詩能文，十八歲順天舉人，二十八歲光緒壬辰進士。歷官兵部武選司，外務部主事，西藏議約大臣參贊，力佐駐藏大臣張懋伯整頓藏事，陳治藏策略，重振威德。宣統二年，任資政院欽選議員，曾奏用君主立憲法。翌年，公元一九一一年十二月，清室遜國詔下，藻翔留書外務部即日棄官南歸，在穗城西貲廡讀書，闢地種菜，顏曰覆園，自號鄒崖逋者。時仍憂懷國事，嘗致書粵督胡展堂，痛陳袁世凱陰謀，促其北征，以匡大局。自鼎革後，當道數請藻翔復出，俱不應，乃流寓香港，晚年以宋儒義理之學，啓迪後進，執教之暇，兼研西方醫學濟世。總編纂順德縣續志。

歷任漢文師範，聖士提反中學，學海書樓等講席，及門多博學成材，有聲於時。遺著有六十自述，嶺南詩存，鄒崖詩集傳世。配室程氏，亦工吟詠，著有盥薇閣詩集。見南海吳天任著何翹高先生年譜。

近代，自公元一九一二年始，夏曆壬子，爲軒轅黃帝紀元四千六百零九年起。

何乃中，字彷檀，廣東中山小欖人，一八七三年出生於原籍。清光緒戊戌武進士，授藍翎侍衛。其後畢業保定將弁學堂，成績優異，與馮玉祥多年共伍軍旅，頗受袍澤愛戴。自鼎革後，以內戰頻仍，閱牆禍結，蒿目時艱，不願再留戎伍，乃退思補過，歸隱家園。一九三四年，小欖第三屆菊花展覽大會，乃中以名重鄉邦，榮任大會主席，與衆同樂。一九五五年病逝，享壽八十三歲。見中山小欖鎮明清兩代科名錄。

何海鳴，原名時俊，湖南衡陽人，生於一八八六年。清末從伍，充副目兼司書生，在軍中不時聽悉革命軍屢潰屢起之消息，感應開始接觸時代巨流。在武昌起義前夕，擔當文化宣傳工作，鼓吹革命，曾被捕入獄。辛亥革命成功之後，一度擁護孫中山先生討伐袁世凱之役，任湘軍總司令，在南京力抗北軍，惜文人質厚，淺於韜略，失敗後逃亡日本。及復回上海，以思想矛盾，方向不定，抑鬱不得志，潦倒窮愁之下，日以譏寫無聊文章，維持其生計，至一九三六年病逝上海。見辛亥武昌首義人物傳下冊。

何錫蕃，字少岳，湖南新寧人。父何岳亭，任清廷都司。錫蕃亦習武，畢業將弁學堂，在清末歷任副哨長，陸軍特別小學堂隊長教員，營管帶。及武昌起義，時黎元洪任都督，錫蕃周覽大勢，乃投効之。黎元洪任爲民軍第二協統領，武昌防守司令官。辛亥革命成功後，曾任水師統制，水警廳長達十餘年，後棄戎伍，從事商業以終，不詳其歲月。見辛亥武昌首義人物傳下冊。

何成濬，字雪竹，湖北隨縣人。一八八二年生於原籍，早年留學日本，加入同盟會，追隨孫中山先生密謀革命。一九零九年畢業回國，先後在湖北督練公所，北京陸軍部任職。辛亥革命之後，曾任南京臨時政府陸軍部副長官，南京討袁軍參謀總長，復參與護法，及北伐

成功，歷任湖北政務委員兼鄂北綏靖主任，軍事委員會委員，軍事總參議，國民黨中央執行委員，湖北省府主席，武漢行營主任等職及參與抗日戰爭，爲國辛勞。至一九四九年移居嘉灣，於一九六一年病逝。見中國歷代名人辭典。

何鍵，字芸樵，湖南醴陵人。一八八七年出生原籍。父何其善，務農爲業。鍵畢業湖南公立法正學堂，曾任湖南都督府民政司事務員。辛亥革命後，棄文就武，復畢業湖北陸軍第三中學及保定軍官學校。參與北伐戰事，抗日戰爭，歷任軍旅要職，國民政府湖南省府主席及內政部長等。至抗日戰爭勝利之後，乃因病告辭，退居休養，一度流寓香港，旋移家臺灣，於一九五六年病逝臺北。見民國人物傳第三卷。

何香凝，原名瑞諫。世居廣東南海，一八七九年生於香港，乃革命先烈廖仲凱先生德配。早歲加入興中會，參與孫中山先生反清室運動，不讓鬚眉，畢生熱愛國家民族，歷任國家要職，爲現代中國傑出婦女領袖之一。曾留學日本東京日白女子大學攻讀博物，及本鄉美術學校隨日本名畫家田中賴章習畫，回國後於公餘與陳樹人，經頤淵，柳亞子等切磋藝文，組有寒之友社。所作山水花鳥，能工能意，以擅於梅松，因號雙清樓主。所爲詩，多涵史實而句法簡練。所爲書，字如其人，老而彌健，允稱三妙。一九七二年病逝北京，享壽九十四歲。見民國人物傳第二卷及何香凝詩畫集。

何炳松，字伯臣，又字柏丞，浙江金華人，一八九零年生於原籍。舉清末秀才，復畢業浙江高等學校，成績優異。鼎革後，即以公費留學美國普林斯頓研究所攻讀歷史。學成回國，從事文教，歷任北京大學歷史系教授，杭省立第一師範校長，國立暨南大學校長，及歷任上海商務印書館史地部主任，編譯所副所長，與所長王雲五共事多年。平生著述，自以歷史爲多，全歸商務印書館出版，計有中古歐洲史，近世歐洲史，通史新義，新史學，歷

史教學法，歷史研究法，秦始皇，浙東學派溯源等多種。不幸於一九四六年病逝浙江國立英士大學校長任內。見民國人物小傳第二冊。

何魯之，四川華陽縣人。一八九一年出生，早歲畢業四川英法文官學堂，修習外文，後以勤工力學負笈法國，入巴黎大學專攻西洋歷史。學成後，服務當地華裔僑團，推動僑胞救國愛國，與曾琦李璜等倡立中國青年黨，回國後，歷任成都大學，成都師範大學，四川大學史學教授系主任，中國人文研究所所長，國民政府委員，國大代表。一九四九年流寓於香港，平生著述，失落於寄運途中，乃抑鬱不得志，晚年復患哮喘，生活頗清苦，因而健康日損，一九六八年病逝。見民國人物小傳第二冊。

何挺穎，字策庸，陝西南鄭縣人，一九零五年生於原籍何家灣。父何根山，清光緒三十一年舉秀才，曾任南鄭高等小學校長。挺穎幼年好學，每試常列前茅，中學時代，值五四運動興起，挺穎在求知欲驅使下，頗愛讀思想進步刊物，隨而關注國家社會發展，在內憂外患之下，參與學生運動，以振國人。一九二五年入上海大同大學攻讀數學。同年接受革命洗禮，加入中國共產黨爲青年黨員，所負任務，身經多次戰役。一九二八年升任師委書記，團黨委書記，邊界特委委員，黨代表等，能以身作則，備受愛戴，一九二九年進軍江西，於吉潭遇襲，重傷逝世，年僅二十四。見中共黨史人物傳第一卷。

何杰，廣東番禺大石人，生於一八八八年。父何蓬洲，爲晚清廩生，居鄉設帳授徒。杰少受庭訓，旋肄業廣州格致中學，習外文，十八歲入河北唐山路礦學堂，習採礦學及鐵道管理學，以績優，考得庚子賠款基金，留學美國，深造地質學，獲海理大學研究院獎學金，進修學成。值辛亥革命成功，一九一四年回國之後，歷任北京大學第一位地質學系主任，天津北洋大學代理校長，廣州中山大學地質學系主任，重慶大學礦冶學系主任，廣西大學教

務長，北京礦業學院副院長。直至文革期間，始以高齡離職，回居原籍。至一九七八年復出席全國科學大會，翌年而終。見番禺文史資料第三期。

何啓，又名神啓，字沃生，原籍廣東南海，一八五九年生於香港。父何福堂，爲香港第一位華人出任基督教牧師，爲合一禮拜堂主管。育五子六女，伯曰神賜，仲曰神添，叔曰神保，啓其季也，五曰神祐。啓生長香港，十三歲負笈英倫進修，畢業蘇格蘭鴨巴甸大學醫學院，復畢業倫敦林肯大律師學院。在留學期間與英國女子雅麗氏結異國鴛鴦，即相偕回香港懸壺濟世，因當時華人對西法醫療，多未能接受，乃兼業律師。公餘常服務社會，隨受委爲太平紳士。歷任衛生局議員，立法局議員，爲華人第一位受英國皇室封授爵士。一八八七年爲紀念其亡妻雅麗氏，乃與姊妙齡，妙齡爲中國外交界前輩伍廷芳博士之妻。得那打素西藥房主人之同意，在香港半山區開設名爲雅麗氏何妙齡那打素醫院。同年復創立香港醫科學院，至一九一二年香港大學成立，始歸併爲該大學之醫學院。當年孫中山先生在香港習醫，即爲啓之門生。啓亦思想進步，關心國運，著有睡與醒，中國基礎與改革，康有爲政見之評論，勵學論，新政眞詮等著述，皆甚有主張。啓且富遠見，早期與友人區德合資購置九龍之東一巨幅土地，名爲啓德濱，其後讓與香港政府興建國際航空站，是爲啓德機場。啓自雅麗氏去世後，續娶黎氏，育子女十二人，子名永乾，永元，永亨，永利，永貞，永感，永謝，成長後，多回國內發展，永貞曾任中國外交部次長兼海關監督。啓於一九一四年逝世於香港。見香港中文大學出版蔡永業著何啓及其時代，又見香港華人名人史略，又見孫中山先生撰伍秩庸廷芳博士墓表。又見廣東文徵續編第一冊卷二。

何東，字曉生，原籍廣東寶安，一八六二年生於香港。幼受中英教育，年十七即任職於粵海關，旋就香港怡和洋行之聘，以勤慎擢升至總買辦，促進中英貿易，爲香港奠定經濟繁榮

基礎，居功不少。復富而好施與，一八九八年即任東華三院主席，出任香港大學創辦人，歷年對該大學之擴展，多所贊助。更關懷國是，曾於一九二三年號召開全國和平會議，以息內戰，以固國體。對祖國歷年天旱水患災害，屢解囊賑恤。手創工商日晚報，爲民喉舌，獲中國政府一等嘉禾大綬勳章，英國皇室爵士勳銜。一九五六年病逝香港，享壽九十五歲，枝葉蕃昌，子孫多顯揚於時。見香港工商日報資料室，又見香港華人名人史略。

何甘棠，字棣生，原籍廣東寶安，一八六六年生於香港，乃爵紳何東之介弟。畢業香港皇家英文大書院，及研習國學，博學羣經。學優而商，任職於渣甸洋行，經理保險，兼辦糖業，花紗，煤炭，雜貨等多種業務，貿易關係遍於中國及南洋各地。既富之後，常作造福人類之舉，十九世紀初葉，廣東常遭水患，甘棠屢捐巨金，以賑災黎。有鑑九龍半島居民求醫跋涉，倡建廣華醫院，何文田痘局。歷任東華醫院主席，保良局紳，潔淨局員，孔聖會創辦人，太平紳士，一九二八年，英廷頒授OBE勳銜。一九五零年逝世於香港。配室施氏，子孫衆多，明德之後，宜必有達人。見香港華人名人史略。

何華生，廣東順德縣人，一八七二年出生於原籍。家世本平常，賴奮志以創業，清光緒庚子年便在香港永樂街開設瑞昌號，初經營疋頭綢緞，後改營中西醫品，業務漸廣，分號遍設兩粵各大城鎮遠至上海及南洋諸島，信孚中外，譽馳南天。公餘致力社會公益，歷任東華醫院總理，保良局紳，華商總會值理，一九二六年任順德商務局主席，該局今稱順德商會，哲嗣耿中，能繼述，亦會任東華醫院及保良局總理，順德商會主席。華生飽經戰時烽火憂患，不幸於一九四五年在日敵獻降前病逝香港。見香港華人名人史略。

何枚士，字超緒，廣東大埔縣崧里人，生於一八七六年。父何伯端，棄儒從商，乃其家族到南洋各地發展事業者第一人，生子四，枚士居長，枚士於清末援例入國學，旋游學日本，

學成回國，任教嘉屬官立中學。鼎革後南渡，先後任星洲啓發學校，吉隆坡尊孔中學，檳城時中中學等校教席。其後回里，服務鄉邦，修先人宅兆，公餘以詩文聯語自娛，至一九五三年逝世原籍。遺著有地理學，物理學教科書，瓊海消間錄等著述。現有子姪後代人數逾百在南洋各地，以生以聚，枝葉蕃昌。見馬來西亞吉隆坡何氏崇德堂家譜。

何彤，字葵明，廣東順德人，生於一八九二年。清末肄業求是學堂，後考進廣東黃埔陸軍小學，升南京陸軍中學，復畢業保定陸軍軍官學校第一期步兵科。投身軍旅，參加革命，辛亥革命成功之後，在母校任教職，後來百粵名將，不少是其門生。彤半生戎馬，迭著勳勞，中年以後從政，先後出任汕頭市市長，廣東省府委員民政廳長，內政部政務次長等職。平生治事嚴謹，待人誠懇，篤行孔子忠恕之道。復事親盡孝，母死，朔望必展其墓，風雨無間，乃有廣東聖人之譽。晚年以患膽管病，養疴臺北市，猶關心社會風氣，國家康強之道，著有因果報應錄數十萬言，勸人爲善，以敦治本。至一九七二年秋舊病日亟，與世長辭，享壽八十一歲。見傳記文學第四十一卷，第六期民國人物小傳。

何漆園，原名家訪，別署桂香閣主，廣東順德東馬寧人，一八九九年出生。幼失怙，賴其母盧太夫人守節撫孤，教養成人。及長，負笈羊城，肄業聖心書院，吸收新知，研習外文，課餘喜愛丹青，浸淫六法，乃從嶺南派宗師高奇峰先生求深造，得與同門黃少強，葉少秉，周一峰，張坤儀，容漱石，趙少昂等，昕夕切磋，乃品德文藝大進。歷任廣州嶺南大學，廣州市立美術學校，佛山市立美術院，香港金文泰中學及多間師範學院教席垂四十年，桃李滿南天。公職退居後，一本廉介自持，澹於名利，而愛習繪事者，多執弟子禮遊其門下，以此娛其晚年。不幸於一九七零年初，忽攬急病，遽歸道山。遺作有漆園畫集一卷傳世。生前爲香海千歲宴雅集會員，見該雅集銀禧慶典特刊。

何卓競，廣東順德人，生於十九世紀八十年代。初赴加拿大雲高華，任維新會之日新報主筆。旅加八年，蒐羅載籍，諮詢僑彥，編成加拿大志一書，凡十七章，報導加拿大郅治之由與工商業之發展，以爲國人有所借鏡。一九一六年轉赴美國，適三藩市華商組織中國郵船公司，乃受聘爲中文書記，編有中國郵船佈告錄一書。就其身歷目擊寫成，爲一冊航運信史。復於一九二零年出任三藩市晨鐘學校校長，教導當地華裔兒女進修國學，不忘其本。不幸於一九二二年因病不起，英年遽逝，中外同深惋惜。見旅美三邑總會館簡史。

何世浩，字桂泉，廣東南海獅山良溪人，生於一八九六年，爲舊金山早期華僑何伯成孫。世浩畢業廣州嶺南學堂，一九一八年赴美，繼承其祖業泗和辦莊，經銷國貨，直至一九四一年珍珠港戰事爆發，東西隔絕，始告歇業，其後在卜奇利埠經營古玩店，以至退休。生平熱心社會福利教育事業，歷任旅美三邑總會館及南海會館值理，輸財出力，造福華僑。一九二三年母校嶺南大學校長鍾榮光赴美爲建築農學院籌款，世浩號召旅美同學踴躍輸將，以完成母校擴展計劃。一九七二年病終美國，有子四女五。見旅美三邑總會館簡史。

何恭第，別署櫻菴，廣東順德羊額人。生於一八六七年，幼家貧，以好學受知於族老南臺先生，使肄業其門下。嘗爲人捉刀，得酬以資膏火。年十九就教席於同邑龍山張翁，翁重其才，妻之以女，旋舉優生，得與海內文士論交，聲名籍甚。嘗上書孫中山黎元洪，草莽陳辭，惜不見用，乃著書課徒，至公元一九三零年而終其天年。見廣東文徵續編第一冊卷三。

何耀平，字慶輝，廣東順德羊額人，出生歲月不詳，年十四即遠渡南洋謀生，先後在檳城，霹靂，瓜拉沙沙，星洲等地從事金飾業地產業務。歷任新加坡廣東幫金飾商會會長，新嘉坡順德會館主席，歿於一九六五年，畢生致力華僑福利事務，故明德之後，必有達人。哲嗣三人，乃強，乃彥，乃殷，皆醫學士。見順德聯誼總會三十周年會刊邑人在南洋史。

何克希，四川峨眉人，生於一九零六年。七七盧溝橋事變前，已在上海從事中共黨務活動，及抗日戰爭爆發，歷任江南抗日義勇軍第三路軍司令員，中共東路工作委員會副書記，新四軍江南指揮部東路司令員，江南行政委員會主任兼地方保安司令員，新四軍第六師副參謀長，浙東區黨委軍政委員會書記，浙東抗日軍政幹校校長等職。人民政府建都北京後，曾任中國人民解放軍第三十五軍政委，浙江省政協副主席等職。一九八二年十二月十七日因病逝世。見抗日戰爭事件人物錄人物中國部分。

何賢，原名相賢，廣東番禺岳溪人，一九零八年出生。自幼勤奮，年十三即從商，一度在順德陳村料理糧油貿易，復在廣州從事錢銀業。一九三八年日敵陷廣州，乃赴香港，一九四一年，香港亦陷日敵，即赴澳門，立業建功，以終其身。歷任澳門大豐銀行董事長，澳門立法會副主席，澳門中華總商會會長，澳門鏡湖醫院主席，澳門東亞大學校董會主席，中國人民代表大會常務委員，中華全國工商業聯合會常務委員，香港何氏宗親總會永遠會長等職。數十年來，愛國愛鄉，支持內外地方建設交通學校醫院及一切社會福利事務機構，不遺餘力，雖身處澳門，能時刻不忘所自。不幸於一九八三年秋間罹肺癌病，醫藥罔效，乃於同年十二月在香港與世長辭。見番禺文史資料第三期及番禺何賢紀念醫院開幕專輯。

何智煌，廣東順德西岸人，一九零二年生於原籍。少誦儒書，曾一度從事耕稼，年十六始就工商，歷釀製，綢緞布疋行業，至壯年在廣州經營食品商店，繼來香港創立振興麵包餅乾公司，行銷中外。平生急公尚義，歷任東華三院，保良局及博愛醫院總理，中華總商會會董，何氏宗親總會會長，香港盆栽會會長，順德聯誼總會會長，順德商會主席等公職。公餘常寄情書畫盆栽，游心於藝，以文會友，著有盆栽與我，以明自強不息。晚年兒孫滿堂，樂享天倫，至一九八三年仙逝香港。見振興公司創業三十五周年特刊及鳳嶺僑聲。

何應欽，字敬之，原籍江西。一八九零年出生於貴州興義縣。畢業貴州陸軍小學，武昌陸軍中學，旋留學日本，其時即加入同盟會，從事反清運動。畢業日本陸軍士官學校後回國，歷任雲南講武堂教席，黔軍總司令部參謀長，黃埔軍官學校敎導團團長，軍政部長等要職。一九三六年十二月十二日西安事變，曾領導軍政，挽轉危局，平息閱牆。抗日戰爭，歷任參謀總長，中國戰區中國陸軍總司令，曾親赴印度檢閱中國遠征軍，聯合盟軍策劃反攻。及抗日戰爭勝利，於一九四五年九月九日代表中國政府接受日本政府代表岡村寧次投降簽約於南京。其後一度出任行政院長，亦武亦文。晚年移居台灣，倡導道德重整運動，著有八年抗戰及中國與世界前途等書。生活恬澹，歲月優游，至一九八七年十月二十一日以九十九高齡在台北市榮民總醫院仙逝。見民國百人傳第四冊。

